



Digitized by the Internet Archive
in 2018 with funding from
Wellcome Library

<https://archive.org/details/b30505938>

DE HYDROPE
EJUSQUE CAUSIS
EXERCITATIO
MEDICA.

Al. Ex. ab. p. Ma. l. an. v. l. n. c. v. l.

L. C. l. n. v. l.

DE HAYDRON

LISSUE CAUSIS

EXER CITATIO

M B D I C A.

DE HYDROPE
EJUSQUE CAUSIS
EXERCITATIO
MEDICA
ANTONII DOMINICI GOTTI
FLORENTINI
AD REGIAM CELSITUDINEM
COSMI TERTII
MAGNI ETRURIÆ DUCIS.



FLORENTIÆ MDCCIX.

Typis Michaelis Nestenus, & Antonii Borghigiani.

Superiorum permissu.

DE HUYDOTE

CHURCH OF ST. MARY

CHURCH OF ST. MARY

CHURCH OF ST. MARY

CHURCH OF ST. MARY

CHURCH OF ST. MARY

CHURCH OF ST. MARY

CHURCH OF ST. MARY

CHURCH OF ST. MARY

303607



CHURCH OF ST. MARY

CHURCH OF ST. MARY

CHURCH OF ST. MARY





REGIA CELSITUDO.



Xigua dona, & an-
 gusta magnis, &
 amplissimis Principibus exhibere non
 nisi audacisanimi, & sibi ipsi nimiùm

fidentis esse diù cogitaveram , nun-
 quam in eam fidem satis inductus , ut
 crederem , posse , absque temerita-
 tis notà , tantum propriæ tenuitati
 tribui , ut vel ipsam Aularum maje-
 statem ambitiosis adire muneribus
 aliquando non dubitet . A veteri
 tamen opinione discessi , cùm men-
 tem opportunè subiit , non ad eos
 tantùm , qui dona offerunt respici-
 endum , sed de præstantissimà etiam,
 & humanissima conditione eorum ,
 quibus dona offeruntur , rationem
 habendam esse . Hoc itaque fuit ,
 quod jamdudum me movit , meam-
 que impulit mentem , ut medicam
 hanc Exercitationem REGIÆ TUÆ
 CELSITUDINIS advolverem pedi-
 bus , nunquam scilicet alibi tantum

humanitatis invenire posse iratus,
quantum in te tui venerantur Popu-
li, & amant exteri. Et profectò non
nisi maximà comitate opus tibi erit,
ut exiguam hanc dissertationem, et
rudem facili excipias vultu, regio-
que digneris obtutu: Ipse quidem
illam abjectam minus, magisque tan-
to Principi accomodatam desideraf-
sem, sed ingenii mei imbecillitas
magnum quid aggredi impotentis
mea simul vota, aliorumque expe-
ctationem decepit. Verum quomo-
do grandius aliquid, augustumque
tuum nomen in fronte gerere digni-
us exarare unquam poteram, cum
tantum, nec vires patiantur meæ,
nec sinat officium? Ea enim ægris
medicam assidue manum præbendi

necessitas mirum, quantum mei ip-
 sius sibi arroget, quantum mihi au-
 ferat temporis, & me ab hujusmodi
 literariis exercitationibus quantum
 obstinatè divellat? Utinam aliquan-
 dò, PRINCEPS SERENISSIME,
 vel promptiùs mihi daretur ingeni-
 um, vel otium securiùs, non adeò
 tunc fortassis abdita mihi forent Na-
 turæ non minùs quàm Artis Medicæ
 arcana, teque magis dignæ paginæ,
 ac stylo feliciori conscriptæ de regio
 COSMI nomine suberbirent. Gra-
 tias intereà tibi ago, SERENISSIME
 PRINCEPS, quod ab his, quale-
 scumque sint, laborum meorum pri-
 mitiis in te uno & singulare decus,
 & firmissimum præsidium queri non
 sis dedignatus, verebuntur etenim

invidi, contentiosique Homines sum in me virus evomere, quotiescumque præsentissimum te rerum mearum Patronum agnoverint. Vale Princeps optime, nostræque felicitati diutissimè vive.

REGIÆ TUÆ CELSITUDINIS

Humillimus Servus, ac Subditus
Antonius Dominicus Gotti.



AD LECTOREM.




*Pusculum hoc , pusillum , inornatum ,
 & rude , en prodit , Amice Lector ,
 in lucem animi tui comitatem , &
 benevolam Indolem tentaturum : A te
 facilibus intueri oculis , hoc saltem
 titulo , fortasse merebitur , quod sibi
 nihil fidat , & nihil de propria te-
 nuitate præsumentis tibi se totum , tuæque humanitati
 unice credere , & commendare voluerit . Innumera tibi
 occurrent legenti , quæ melius in obscuro scribentis in-
 genio latuissent , adeo enim levia sunt , & adeo inania ,
 ut mirum sit , quomodo in lucem prodire , atque a te ,
 tuæque tantum exigere patientiâ non erubuerint ; Ve-
 rum id ipsum , quod me quasi stultitia notat , optime
 tuo Nomini consulere poterit , si a te humaniter , liben-
 tique animo excipiatur . Quid enim splendidius , quid
 gloriosius , quàm humilem aliorum conditionem non modò ,
 non contemnere , sed cum eadem amicè agendo , illam qua-
 si erigere , ac sublevare ? Hoc autem si prestare non
 dedigneris , qualem mihi addes animum , ut nova moliri
 teque*

teque novo fortasse afficere tadio non dubitem ! Sic tu ,
 quis crederet ? de audaciâ nostrâ in culpam vocaberis ,
 nostræque temeritatis fiet quasi reus , quia nimium ali-
 quando comis fuisti ; Sciò tamen te ab hujusmodi crimi-
 nibus non abhorrevit , a te etenim exigit singularis tui
 Cordis amabilitas , ut literarios labores , qualescumque
 sint , gremio foveas , & an indè scribentium ani-
 mus audaciùs se gerere discat curare renuas :

Hoc illud est , quod de te sentire ,
 & a te sperare juvat .

Vale .





Dicendorum Occasio, & Ordo.

C A P. I.



Rovido Navis Gubernatori pluribus in locis Medicus comparatur à Tullio, (a) cui obsecundans Galenus *omnibus*, inquit, *affectionibus Medicus in commune rectè prospiciet, & praecebebit, quemadmodum bonus Gubernator per futuram tempestatem*; [b] Et quidem, quid aliud est morbos curare, cùm vigent, vel arcere, cùm imminet, quam fragilem humani Corporis ratem, aut vehementibus tentatam procellis incolumem, artis auxilio servare, ne obruatur, & pereat, aut si tempestas impendeat, cursum cautè dirigere, omnemque operam adhibere, ut quantum fieri potest, navis ipsa, frustrà ingruentibus ventis, periculo subducatur? Mirum verò, quot in primo casu sese obiciant agitationes, quot fluctus, quot naufragia, adeo ut ne-

A mo


[a] Cic. Lib. 1. & 5. de finibus Bon. & Mal. Lib. 5. de Natura Deorum.

(b) Gal. in Comment. 3. prognost. Hippocr.

mo ita expers consilii sit, ut certamen potius cum procellis inire velit, quam ab ipsis prævisis declinare, præsertim si longa docuerit experientia, hujusmodi prælia fere semper cum navigii interitu infelicer evenisse. De Hydrope igitur verba facturus, idem concipiatur volo, tanquam tempestas horrida, ita ægros in ultimum vitæ discrimen adducens, ut inter insanabiles prorsus morbos possit merito recenferi. In hujus propterea curatione nihil immorabor, cum non nisi funestum promittat exitum, & id, quod in hujusmodi affectione exhiberi passim solet satis, superque impleat Medicorum volumina; Hydrops, de quo loqui, & quem curare intendimus ille est, qui nondum adest, ille videlicet, qui adesse poterit, nisi eidem iis, quibus par est, armis, obviam eamus, & pugnemus, non cum morbo, fatali semper hoste, & timendo, sed cum morbi ipsius licet remotissima suspicione; Verùm quid remotissimum appellamus id, quod frequens adeo est, & universaliter adeo grassatur, ut plus æquo fortasse prope sit multis procella ista, & jam tumidum mare, sonantesque sibi fingat undas justissimus noster timor? Ea nempe est deplorabilis temporum nostrorum calamitas, ut hæc ipsa, si non unica, cæteris saltem latior patere videatur ad mortem via; Et profectò tanta Hydro-pum per urbem nostram, non multis ab hinc annis, vagantium copia cujus non movit animum, & a quo audita fuit absque admiratione, & absque lachrymis? Ipse etiam miserrimam hanc Hominum conditionem luctu huc usque, & lamentatione sum
pro-

prosequutus, sed inutilis noster dolor in ventos abiit,³
nec minus sævire à nostris fletibus funestissima ista cla-
des hætenus didicit. Placuit itaque ad morbi nimium
domestici Ideam, causasque examinandas mentem
appellere, & quoniam Hydrops, qui crebrioribus,
ac sævioribus ictibus corpora aggreditur ille est,
qui Ascites nuncupatur, ideo omiſſis reliquis, per
Medicorum ora paſſim vagantibus, Leucophlegma-
tià ſcilicet, ſive Anaſarcà, & Tympanite, de illo uni-
cè verba faciemus, noſtri potentioris, ac præſentio-
ris hoſtis dolos detegere, ut faciliùs evitari poſſint,
curantes. Primo igitur Hydropem juxta Veterum com-
menta breviffimè conſiderabimus, ſecundo loco, ali-
qua de ductibus lymphaticis, lymphæ, ejus motu,
uſu, & ſimilibus, tertio deinde verius morbi hujus
ſyſtema ex recentiorum inventis exponemus, Ulti-
mo, ad cauſas Hydropis perpendendas ſcendentes,
in iis unicè aliquantulum immorabimur. Jam ergo
exordiamur a primo.





Veterum Medicorum de Hydrope, ejusque Causis Sententiæ.

C A P. II.



Ydrops Ascites, sive aquosus, sive Aqua intercus, sive aliter apud alios nuncupetur, tumor totius abdominis ab aquoso humore genitus ab omnibus, tam veteribus, quam recentioribus Medicis definitur, Verùm in hoc uno consentientes vetustorum temporum Medici mirum postea quàm inter se pugnare videantur circa modum ferossæ hujus collectionis in infimo ventre efformandæ, Miserrima etenim tunc in anatomicis rebus, vel cæcitas, vel caligatio in causa erat, cur amplissima nugis mille, & mille figmentis via sterneretur. Hepar, primo loco, viscerum omnium quasi regem, & humani corporis moderatorem, ac principem arbitrati, *ibi dignam animæ sedem, ibi virtutem*, ut Galeni verbis loquar, *secundum quam nutrimur, & augemur, & cibum appetimus, & assumptum elaboramus concoctione, & digestionem*, [c] & ibi tandem sanguinis universam fabri-

(c) *De Virt. nostr. Corp. disp.*

5

bricam, & distributionem constituerunt. Hisce fundamentis innixi Ascitis causam statim Jecori male affecto tribuerunt, rationi maximè consentaneum judicantes, ut sicuti a bonà sanguificatione in sano Hepate universa Corporis œconomia ritè, ac laudabiliter conservatur, ita a malà in hoc viscere sanguinis elaboratione morbus hic perniciosissimus gigneretur; Atque ita hæc opinio apud illos invaluit, ut quotiescumque Asciticus occurreret, a malo Hepatis habitu ad malam sanguificationem, a malà sanguificatione ad feri tracolationem, & stagnationem, brevi gradatione, descenderent. Inter pravas Jecoris affectiones Hydropem producere aptas, numerare illis placuit ipsius intemperiem, obstructionem, Scirrhum, vel rimam quandam in ejus substantià, culpà nimix siccitatis, ortam. Quidam verò Hepatis amantiores socium illi in ascite causanda Lienem fecerunt, eumque aliquo pacto vitiatum ad funestissimi hujus morbi productionem concurrere putaverunt: Rem autem sibi ita fingeant; Chylus, aiebant illi, in ventriculo elaboratus simul cum sero attrahitur ab Hepate, & Liene, quæ viscera serosam portionem, quæ superest, post ejusdem Chyli distributionem, mandant ad renes, unde per ureteres, & vesicam extra corpus educitur: Quæcumque itaque causa sit, quæ virtutem hanc, ut vocant, attractricem in hisce visceribus lædat, necessario pessima serosæ humiditatis distributio consequetur, & facillima in abdomen irruptio, atque stagnatio. Quoniam vero cadaveribus inspectis eorum, qui ascitici è vità mi-

gra-

graverant, aliquando sanissimum Jecur, & sanissimum Lienem invenire contigit, familiarius apud ipsos erat effatum a facultatis attractricis in hisce visceribus debilitatione Hydropem gigni; immo a citissimo aquarum thermalium per urinam transitu decepti breviorrem quandam semitam feri evacuandi sibi finxerunt, putabant enim per vas, quod breve nuncupabant, attrahi a Liene serum, & aquam è ventriculo, ac deinde, per vias propiores, ad ureteres derivari, unde etiam, in hoc casu, virtus attractrix læsa, licet in solo Liene universam feri distribuendi methodum statim corrumpere. Huc usque causam Hydropis ad serum non laudabiliter attractum a visceribus, ac proinde fluens libero, & insolenti cursu, quàm datur via, retulerunt; Non tamen hæc sola illis morbi hujus initia statuere placuit, sed modò Jecur ipsum nimiam aquam infarctum, atq; distentum ipsius exsudationi in abdominis cavitatem obnoxium esse, modò vasa meseraica a sero, vel nimio, vel nimis acri, & mordaci aut dilatari, aut disrumpi, & aquosam interea colluviem in infimo ventre colligi arbitrati sunt. Non minùs in vasis per omentum discurrentibus fieri posse dilatationem aliquam, vel erosionem a Sero, quod a Liene illhuc pleno gurgite fertur, contendebant Hippocratis auctoritate suffulti, qui (d) *in ventriculum, ait, etiam potus fertur, quo cum expletus fuerit, ab eo Lien recipit, & ad venas, & omentum transmittit, & alibi, in tumorem autem sublatus,* & op-

(d) *Lib. 1. de Morb. Mulierum.*

& oppletus [loquitur de Liene] per venas aquam in Corpus transmittit , præcipueque in Omentum. Ipsi etiam renes , cum , in Veterum sententia , Serum per emulgentes attrahere debeant , ut a nimia ejusdem colluvie partes liberentur , si hoc , facultatis propriæ vitio , præstare nequeant , remanebit in venis , & paulatim in abdomen effundetur. Hæc , & pleraque alia de Ascite , ejusque efformandæ modis Veterum monumenta pervoluentibus sese obviam facient , eorumque sententias , maximà cum admiratione , excipere , ut arbitror , oportet , tunc enim pene in incunabulis volvebatur Anatome , & obscurissimis latebat tenebris involutum , quod nostris hisce temporibus luce ipsa clarius emicat. Quomodo etenim sibi decantatam illam vim , seu facultatem attractricem fingere potuissent , si humani Corporis œconomià feliciùs investigatà , ea illis innotuissent , de quibus nunc anatomica fervent Theatra , & recentiora tempora gloriantur ? Compertam nempe habuissent pulchram , illam motionum omnium necessitatem , ac legem , & verè mechanicam methodum , qua utitur Natura ad proprias operationes rite exequendas , unde quæcumque in Corporis fabricà passim occurrunt , magnalicer , & admiranda , non ad somniatas facultates , & consueta inscitix Asyla , sed ad instrumenta , & organa necessariò operantia sapientiùs retulissent. Ipsam etiam sanguificationem in Hepate male a Veteribus constitui statim agnoscet , qui Cordis , & Arteriarum structuram , lacteorum , aliorumque ductuum chylo inservientium munus , & Pulmonum , aerisque usum ,

usum , ex recentiorum inventis attentius excogita-
 verit; Constat etenim unicum Hepatis officium esse,
 humorem biliosum a massa sanguinis segregare , &
 per proprios excretorios ductus ad duodenum tran-
 smittere. Ultimo loco , vas illud , quod breve nun-
 cupabant , & cui tot usus passim tribuebant Antiqui,
 jam notæ circulationis leges , & anatomicæ inspectio-
 nes nil aliud esse docuerunt , quàm venam quandam,
 seu potius venas quasdam , sanguini ad cor redu-
 cendo , ut cæteris omnibus venis incumbit , destina-
 tas. Verùm hæc de Ascite , juxtà Antiquorum pla-
 cita , sint satis. Maria seculis omnibus nota ce-
 leri huc usque navigatione lustrasse

sufficiat , pateant jam novi flu-

ctus , novæ sternantur un-

dæ , & nostram re-

cens inven-


tis

aquis , felicioribus auspi-

ciis , navem cre-

damus.





De Ductibus lymphaticis , & lymphà .

C A P. III.



Lnfans per plura secula , suisque undique tenebris circumfusa adolevit jam , & fulgentissimis novisque radiis enituit res anatomica : Et quidem multum debemus solertiae tot illustrium Virorum , qui immensis laboribus , studiisque , adeo planam , oculisque omnibus perviam humani Corporis fabricam fecere , ut jam sensibus ipsis clarè , & evidenter pateant , quæ nullum caput , mens nulla attingere cogitando potuisset . Quis enim , (ut cæteris omissis , de his unicè loquamur) lymphaticos ductus , & in ipsis contentam aquam in animum induxisset , nisi præstantissimus ille Vir prodigiorum in observationibus Bartholinus primus omnium invenisset , totique anatomicae Reipublicae præclarissimum hoc inventum per scripta communicasset ? Nobis igitur gratulemur , quod tam amplum rebus nostris , ab ultimis Daniæ finibus , vectigal advenerit , & in ipsius contemplatione jucundissimè pariter , & ad id , quod in posterum dicturi sumus necessarià paulum

immoremur. Motus ille Sanguinis, quem circulationis nuncupavit inventor Harveus, jam non per sola fertur Medicorum ora, sed artis nostræ fines prætergressus innotuit ubique, ubique passim circumfertur, de ipso fit ab omnibus sermo, & rerum omnium inscium de hoc uno sapit rude, profanumque Vulgus; Verùm, cùm omnium sit nudum hoc circulationis nomen jactare, Medici tantùm est ipsam exactiùs perpendere, per ejus arcana ducere ingenium, nullumque ex iis, aut instrumentis, aut machinis, quibus sagacissima utitur Natura ad sanguinem circulariter promovendum, cogitando præterire. Posito igitur amplissimo illo arteriarum, venarumque apparatu, per quas fluit, refluitque Sanguis, placeat jam, cùm de Sanguine refluyente loquimur, tertium vasorum genus considerare, per quæ pars aliqua ipsius Sanguinis redit ad Cor, aquosa scilicet, seu aqua ipsa; Vasa vero hæc, de quibus loquimur, sunt quidam innumeri canaliculi exiles adeo, ut oculum, nisi humore sint turgidi, omninò fugiant, lymphatici vulgò appellati: Tunicæ ipsos constituentes tenuissimæ sunt, & diaphanæ, aliquibus veluti nodis præditæ, quibus vas ipsum inæqualiter constringunt, ita ut quibusdam in locis elevetur, & tumeat, deprimatur verò in aliis, ac pene concidat; Oritur hoc a valvulis semilunaribus in interna vasorum superficie quasi æquidistanter positis, & motum contenti liquidi a centro ad circumferentiam, prout infra dicetur, prohibentibus. Eorum origo est ab Arteriarum extremitatibus, unde sinuoso feruntur

tur cursu, non ad unum, eundemque alveum, sed ductus a variis partibus scaturientes per varias errant semitas, variumque demum fortiuntur terminum, illi etenim, qui infra septum transversum nascuntur ad receptaculum Chyli concurrunt, qui verò in Thorace sunt, in thoracicum ductum desinunt, & qui extrà Thoracem a collo, & artubus ortum habent venam jugularem externam ingrediuntur; Hæc omnia & ab ipsis Anatomicorum fontibus haurire licet, & patienti, industrique curà, in diligenti Animalium sectione investigare. Positis hisce ductibus, ponatur statim oportet humor aliquis eosdem implens, per eosdem fluens, iisdemque mediantibus, sese in aliquem peculiarem, certumque locum pleno gurgite effundens; Humor autem iste non Sanguis est, non Serum, sed pura quædam, limpida, & crystallo similis aqua ad magnos usus, eosque fortasse præstantiores, quàm qui huc usque in angustos Medicorum animos irrepsert, a Sapientissimo rerum Opifice comparata. A corde jam Sanguini permixta fluit per arterias hæc lymphæ ad irrigandas Corporis partes, ibique, partim, ab ipso Sanguine segregatur, & in alium cursum deflectit. Quid verò de instrumentis, & machinis, quarum operà hujusmodi segregatio fit, suspicati simus, consultò omittimus, cùm nihil, aut saltem parum ad ea, quæ dicturi sumus conferre videatur obscurissimas separationum rationes scrutari, ad aquam potiùs nostram, unde discessimus, redeamus, ea enim jam principiis lymphaticorum imminet, per ipsos jam fertur vel in Chyli cisternam, vel

in thoracicum, vel in jugularem, vel etiam alibi, ac demum post varios, longosque gyros, ad Cor ipsum remeat suæ circulationis habitura terminum, ubi habuit exordium. Motus hujus, quasi dicam, perennis vulgare habemus exemplum in fluviis pene omnibus, hi enim a media manantes rupe, incerto primum sono, placidoque cursu, per saxa repunt, & gramina, donec aliis passim rivulis cum ipsis coeuntibus, novis aucti, & quasi superbientes undis, per campos latè spatiantur, vallesque, & modò a riparum angustis, modò ab aggerum impedimentis, modò a lacubus ipsis victores egressi, in mare demum se exonerantes aquas simul perdunt & nomen, verum mare ipsum, quod flumina absorbet, flumina, ut inquiunt Aliqui, reparat, per occultos enim, cæcosque ductus, novum ad fontes ipsos humorem transmittit, unde aqua irriguè prorumpens easdem rursus alluat terras, iisdem crescat auxiliis, idemque demum Oceano vectigal afferat. Non dissimili ratione motum suum peragit lymphæ nostra, sed aliquando sola, Chylo aliquando permixta Sanguinem ipsum, repetit, unde exierat. Nec timetur in ductibus lymphaticis de contenti humoris versus originem suam regressu, etenim ne retrò properet, & recurrat, optimè, ut superiùs innuimus, cavit Natura, valvulis prorsus innumeris ita in eorundem cavitate dispositis, ut a partibus ad Cor, sive a circumferentia ad centrum liber pateat transitus, nunquam è contra. Nunc igitur cùm de lymphaticorum ductuum fabricà, origine, progressu, & insertione, atq; in iisdem con-

contentæ lymphæ motu loquuti simus, & satis, ut arbitror, abundè in hisce omnibus brevitati consultum sit, superest, ut eadem servatà methodo, nonnulla de aquæ hujus conditionibus quibusdam, & usu, quasi transeuntes, attingamus. Ex anatomicis itaque dissectionibus constat, lympham istam nullum, aut jucundum spirare odorem, aut gravem, nullo colore infectam, nullo sapore præditam esse, sed purissimæ, & limpidissimæ aquæ, in omnibus assimilari; Malumus etenim cum inventore Bartholinio loqui, quàm cum aliis nonnullis colorem subflavum lymphæ tribuentibus, non minùs in hoc deceptis, quam cùm eandem lympham viscidulam appellarunt, mirum enim, quàm tenuis sit, in statu naturali, quàm levis, quàm fluens! Et quidem cùm maxima sit, & quasi oculis se subducens exiguitas canalium, per quos fertur, si aliqua aquæ huic inesset visciditas, vel omninò a motu cessaret, vel lentissimè moveretur, exitiale utrumque, & utrumque, si præter naturæ ordinem, aliquando contingeret, corpori perniciosissimum, & funestum. Quid verò tanto aquarum apparatu molita sit Natura, quidve præstaverit non satis fortasse hætenus ex toto compertum est, licèt adoleverit jam nobile hoc adinventum, multorumque jamdudum Medicorum animos rapuerit mirum in modum, & fatigaverit. Nos itaque, magni nominis Anatomicis facem præferentibus, dupliciter lymphæ hujus officium perpendemus, cùm nimirum simul, cum Sanguine arterioso ad quascumque partes Corporis fertur, & cùm ab eodem disjuncta per

pro-


proprios ductus, vel a Chylo mutuatos ad Cor regreditur. Quod autem ad primum attinet, pluribus ipsam Corporis nutritioni destinata esse contendentibus assentiri juvat: Putant etenim partem hanc Sanguinis candicantem, una cum ejusdem Sanguinis crassamento purpureo, & determinato Spirituum influxu, ad alendum Corpus peculiariter concurrere, ac de hujus rei veritate dubitari non posse, cum Borellio [e] affirmant, quoniam Sanguis componitur ex succis simillimis eis, qui in Ovis pusillum Animalculum nutriunt, & citissimè augent, & perficiunt, glutinosà scilicet parte non minùs, quam tenui, albumineà, atque concrecente ad ignem substantià; Idem verò, exemplo Animalis præ fame mortui ulterius confirmatur: In ejus enim arteriis Sanguinis quidem partem rubram invenire contingit licet densam, & quasi arefcentem, partem verò albam nullibi reperire datum est, unde coniecere licet, non a purpurea tantùm, & crassà, sed a candidà, & tenui Sanguinis parte, quæ lymphæ est, suum Corpora nutrimentum haurire. Quoniam verò & ipse Sanguis Chylo indiget, quo repareretur, nec satis expeditè versus Cor ipsum moveretur Chylus per suas lacteas, nisi tenuior quidam humor eidem admisceretur, humor autem sese in chylicos ductus effundens nil aliud est, quàm lymphæ nostra, constat jam evidenter, in hoc secundo casu, aquam hanc Chyli vehiculum esse, ut scilicet celerius, & felicius in Sanguinem eat.

Ve-

[e] *Lib. 5. de Oeconom. Animal. propos. c c.*

Verùm quid de humoris hujus limpidissimi plura loquimur? Lympham hanc in naturali statu laudabiliter constitutam huc usque perpendisse sufficiat: tempus jam, ut eidem male affectæ, & ab optimis enumeratis conditionibus recedenti aliquid tribuamus.





Hydropis Systema ex Recentiorum inventis.

C A P. IV.



Uocumque morbo tentetur æger, aspicitur non sine animi perturbatione, & tristitiâ, Hydrops non sine commiseratione, & horrore, & cum in cordis sui recessu quisque dumtaxat doleat cæteris affectionibus Homines detentos videns, ad funestissimum Ascite laborantium aspectum, vix lachrymas, verius interni tumultus indicium continebit. Misero attolluntur ægroto in ingentem tumorem pedes, femora, scrotum, Abdomen, distensionem patiuntur, & nonnunquam disruptionem cutis, & fibræ: Fluctuat in infimo ventre contentus humor, & in tanto aquarum proventu, nulla, vel paucissima, eaque semper rubra manat urina: Adduntur creber, parvusque pulsus, decolor vultus, emaciatus, & tristis, inappetentia, & nausea, in respirando difficultas, & labor: Uritur interea, & semper uritur infelix a siti, quot vidit, vel quot vidisse potuit fontes, & fluvii subeunt ad dolorem,

eò

eò calamitatis deducto, ut se ab aquis opprimi sentiat, & aquas cupiat; Verùm subducatur jam a commiserantium oculis æger, nihil enim proderit, si intueatur, & saniori consilio, quid ægrum ipsum in adeo funestum rerum statum præcipitem egerit inquiratur. Primo itaque loco, morbi hujus causam, ut inquiunt, immediatam statuamus oportet humorem aquosum a propriis ductibus prodeuntem, & se in Abdominis cavitatem effundentem, circa rationem verò, ac modum, quo aquosa colluvies, & colligatur, & augeatur valde etiam nunc ambigitur, licet frequentissimus tot Hydropum aspectus tam magnum cogitandi locum Medicis faciat, eorumque sibi mentes, mirum in modum, & studia vindicet; Quidam etenim, ut rem paucis perstringant, lymphaticos præcipuè ductus in culpam vocantes ad celebrem illam, & nunquam satis decantatam ipsorum, vel rarefactionem, vel disruptionem confugiunt, hanc necessariam Hydropis causam, funestamque morbi hujus radicem unicè statuentes. Et profectò ab hujusmodi ductibus, vel rarefactis, vel disruptis Hydropem excitari posse, nemo est, qui in dubiū revocet, tunc etenim lymphæ in ipsis contentæ, vel exsudans, vel diffluens in Abdominis cavitatem rueret, eamque immaniter demum impleret. Hanc verò hujusmodi vasorum labem, multiplici de causâ, contingere posse manifestè constabit, si præter ea omnia, a quibus extrinsecè lædi possunt eadem vasa, ut vehementes Corporis motus, ictus, & similia, ea etiam, quæ intrinsecè idem præstare valent, perpendere li-

beat : Quid autem lymphaticis intrinsecum magis ,
quàm lymphæ , illa scilicet , quæ per eosdem fluit ,
& a qua eorundem tunicæ tanguntur semper , & ir-
rorantur ? Lymphæ itaque quoties naturæ non paret
legibus vasa ipsa lædit , per quæ movetur , & cùm in
nostro Corpore perfectus exigat ordo rerum , ut ea
tenuissima sit , saporis expers , & quendam ulteriùs
fervet in quantitate modum , adeo ut canalibus ipsis ,
per quos ferri debet , aliquà proportionem respondeat ,
quocumque modo vitietur eadem lymphæ , ita ut ab
optimis recensitis conditionibus recedat , de ductibus
ipsis , per quos agitur , pessimè mereri poterit , nos-
que in manifestissimum Hydropis periculum addu-
cere ; Sit enim vel vitio instrumenti , quodcumque
illud sit , à quo separatur , vel Sanguinis , a quo di-
scedit , non tenuis lymphæ , sed ut falsò arbitratus
est , in naturali statu , quidam aliàs peritissimus Ana-
tomicus , lenta , ac viscidula , cùm principia lymphæ-
ticorum , penes magni nominis Viros , sint angustis-
sima , ipsam excipere non poterunt , & palustres illas
aquas nullum nactas alveum , quàm dabitur via , per-
niciosissimà libertate , sinent excurrere ; Et si non
hæreat statim in vasorum osculis , ut rationi maximè
congruum est , sed ipsa , licèt viscida sit , subeat lym-
phæ , cùm non nisi tardissimè , ob proprium lento-
rem , moveri possit , nonne periculum imminet sa-
tis evidens obstructions in ductibus ipsis efforman-
di ? Atque hoc si contingat , cùm ultra contentus
humor progredi nequeat , & se a novo semper , eo-
que uberrimo aquæ proventu premi sentiat , lym-
pha-

phaticos suos, ultra membranarum vires, implebit, eorumque fibras nimium distrahet, ac dirumpet in ventrem ruiturus & viscera. Rursus, aut falsa, aut acida & mordax sit lymphæ, idem illa præstabit, quod peculiare est cæteris humoribus, quotiescumque pessimis hisce conditionibus comitantur: Nostro experimur damno, ulceribus etiam foetidissimis efformandis falsas, acidasque particulas aptas esse, poterit igitur non minùs hujusmodi lymphæ fibras erodendo discindere, & eo feliciùs malam explebit indolem, quò graciliores erunt partes, quas alluit, sed exilissimæ membranæ sunt, & fibrillæ, quæ lymphaticos ductus constituunt, parvo ergo labore a noxio liquido lacerabuntur, nec prohibere poterunt ampliùs, ne in Abdomen, non nisi cum vita discessurus, feratur. Exuberet denique plus, quam par est lymphæ nostra, cum Vasa lymphatica vehementem distractionem, ob exilitatem, pati non possint, excedentem humoris copiam, vel non recipient, vel nimium ab ipso distenta frangentur. Exemplo sit fluvius, qui donec aquarum moderatè dives, humili fertur cursu, antiquos lambit, & non evertit margines, verùm hyemalibus pluviis, nivibusque solutis auctus, & superbus, aut alvei sui angustiis coherceri non finit, & magnà sui parte per campos latè diffunditur, aut aggeribus fractis, ac ripis, agros populatur, & sylvas, veteris jam cursus pertæsus, & in paludes, lacusque pleno se gurgite exonerans. Non ergo viscida, non falsa, vel acida, non denique nimia sit in nobis lymphæ, hæc etenim omnia.

pessimè Corpus afficient, & a laudabili valetudine
 avulsum Hydropi damnabunt, & morti: Quæ om-
 nia etiam faciliùs contingent, si iis pravis lymphæ
 conditionibus addatur mala partium constitutio, la-
 xa, & enervis lymphaticorum structura, naturali
 minor eorundem capacitas, & quæ aptam non ha-
 beat proportionem cum capacitate arteriarum, cum
 impetu Cordis, & cum mole Corporis cujus sunt
 canales. Verùm, licèt lymphaticorum culpà, cùm
 scilicet rarefiunt, vel disrumpuntur, oriri possit,
 & interdum oriatur Hydrops, non hæc unica ta-
 men ad eundem via est, adeout quotiescumque Hy-
 dropicus occurrit, pro certo habere debeamus, va-
 sa in eodem lymphatica, vel laxioris compaginis fa-
 cta esse, ac propterea lympham ab iisdem exsudare,
 vel disrupta esse penitus, & lympham ab iisdem ef-
 fluere, nunquam enim hætenus contigit testem hu-
 jusmodi disruptionis autopsiam adhibere posse, licèt
 innumeri passim Hydropes cultro anatomico tentati
 fuerint, eorumque viscera industri, & accuratà in-
 dagine examinata, quin potius non a quacumque
 lymphaticorum diffractione Hydropem produci com-
 periemus exemplo certo satis, & satis vulgari: No-
 vimus enim omnes, nosque sensus ipsi docuerunt,
 pulmonum substantiam innumeris prorsus lymphaticis
 scatere, & hujusmodi vasorum ingens Satelliti-
 um ab exterioribus eorundem pulmonum partibus
 versus ductus thoracicos perreptare; Scimus insuper
 a Phthisi correptis ulcus in pulmonum substantia in-
 feliciter geri, & eò infeliciùs, quò magis, ac magis
 fer-

serpens in dies fatalis lues magnam pulmonum molem absumit paulatim, ac dissipat; Dum verò pulmones lacerantur, nonne & lymphæ ductus ibi hospitantes, & per universam eorundem pulmonum substantiam sparsi lacerentur oportet? Sed ubi in tabidorum thorace hydropicus latex? Ubi pectoris Hydrops? Hinc itaque coniicere quisque poterit, non a quacumque lymphæ ductuum disruptione Hydropem excitari, fieri enim aliquando potest, ut adeo parvus, & miser sit lymphæ proventus per lymphatica vasa fluens, & consequenter ab aliquo ex ipsis disrupto erumpens, ut ad molem hydropicam subcrescere nequeat, sed vel a viscerum calore attenuetur, & vaporis formam induens, per transpirationem, a corpore educatur, vel, ut in Phthisi laborantibus contingere arbitramur, a lymphaticis stillans, cum sanguine ibi putrescente putrescat, & veteres lymphæ conditiones amittens in crassiorem substantiam, & purulentam degeneret. Veluti tamen lymphaticis disruptis, non semper consurgit Hydrops, ita iisdem aliquando illæsis in huiusmodi morbum incidimus: Si enim circa viscus aliquod obstructions, tubercula, tumores scirrhusi, & similia excitentur, adeo ut pars sanguinis aquosa exsudet a propriis vasis, en pericula statim, en Hydrops. Hanc verò exsudationem ab impedimētis motum sanguinis, aliqua in parte, inhibentibus produci posse, ligaturæ in vivorum Animalium vasis sanguiferis adhibitæ satis, superque docuerunt; Si enim jugulares venæ filo excipiantur, & ita occludantur, ut sanguis

guinis reductio prohibeatur, tota capitis regio, ut inter cæteros observavit Villisius, (f) aqua impletur, brevique intumescet; Quod si hujusmodi tubercula, aut Scirrhj juxta eorundem lymphaticorum origines excitentur, adeo ut nimium compressæ, & fortasse obstructæ humorem suum non excipiant, idem humor diffluet, quâ poterit, & quâ dabitur via, effundetur, & ruet; Viscus autem aliquod obstructionibus abundans hydropi viam sternere satis patet, si idem Hydrops quartanariis aliquando superveniens considerari velit, longius enim si hæreat quartana ita, ut, quod sæpissimè accidit, lienosi Homines fiant, obstinataeque in hoc viscere obstructiones gerant, tunc Hydrops non rarò subsequitur, quod suis etiam temporibus, observans Hippocrates: *Quibusdam, inquit, spleneticis, progressu temporis, in Hydropem morbus degenerat*: [g] Et hoc quidem haud aliter evenire arbitrandum videtur, quàm quia, liene ex crassiorum humorum infarctu indurescente, vasa ipsa lymphatica, eorumque fortasse origines comprimantur nimium, ac propterea humorem suum vel recipere nequeant, vel ad certum alveum derivare. Quod si Sanguis ipse dissolutus sit nimium, partemque sui subtiliorem, aquam scilicet, per minima arteriarum oscula emittat, vel si eadem oscula laxa sint nimium, & quod tenue magis, magisque crudum in sanguine est juxta arteriarum, & ve-

na-

[f] *De Medicam. operat. Sect. 2. Cap. 3.*

(g) *Lib. de Affect. Cap. 16.*

narum, ut ajunt, intercapedines effluat, en aliæ ad Hydropem viæ. Dolores præterea in Abdomine ab immani, & spasmodica spirituum explosione geniti mirum, quàm facilè Hydropem producere valeant! quod innuens Hippocrates *quibus, inquit, tormina adsunt, & circa umbilicum cruciatus, ac lumborum dolor, qui neque medicamento, neque aliter solvuntur, in siccum Hydropem firmantur.* (b) Siccum verò Hydropem nunquam sine Ascitis admixtione excitari neminem latet, & consequenter humoris lymphatici effusionem a doloribus in infimo ventre grassantibus effici non rarò posse: Cùm etenim affectiones hujusmodi spasmodicas graviora tormina inducentes, pressiones viscerum, fibrarum distensiones, & similia, ob magnam Spirituum explosionem comitentur, vel ita comprimì lymphæ ductus ipsi poterunt, ut humor per eosdem fluere libero, naturalique cursu nequeat, vel ita distendi aliquando, ut fracti demum suam in Abdominis cavitatem lympham effundant. An non & alvi fluxus, si immodicus sit, & diuturnior, adeo Corpus afficit, ipsumque a naturali statu adeo deturbat, ut cacheticum sæpissimè faciat, & in Hydropem denique adducat? Licet enim aliquando, ex Hippocratis testimonio, alvi turbationes conferre possint, si scilicet *qualia oportet purgentur*, (i) non rarò tamen in noxias, & funestas degenerare observantur, si plus, quam par est alvum purgent, & hujus-

(b) Lib. 4. Aphor. 11.

(i) Aphor. 2. Lib. 1.

hujusmodi fluxus magnus nimiùm sit, nimiùmque obstinatus, Celsus propterea *uno die*, inquit, *fluere alvum sæpè pro valetudine est*, atque etiam pluribus, dum febris absit, & intra septimum diem id conquiescat, purgatur enim Corpus, & quod læsurum erat utiliter effunditur, verùm, spatium periculosum est, interdum enim tormina, ac febriculas excitat, viresque consumit. [k] Et quidem magna illa virium prostratio, quæ immodicum alvi fluxum consequitur, adeo ut æger tantum vix roboris exerere valeat, quantum ad miseram, & quasi exanimem vitam ducendam sufficiat, nonne ostendit manifestè, maximè depauperatum sanguinem esse, & in ipso exiguam spirituum copiam, vel eosdem spiritus enerves nimiùm, & nimium languidos hospitari? Cum etenim motiones quæcumque a congruo spirituum influxu pendeant, si ex debiliores fieri, & languescere paulatim conspiciantur, dicendum erit, vel eundem influxum comminutum esse, vel id, quod influitur, minùs vividæ conditionis esse, & minùs activæ: Sanguis autem adeo inops, & in adeo tenui, miseroque statu constitutus sanguificationis operi absolvendo ineptus omninò fiet, & in crudam, imperfectamque Chyli substantiam, ut infra ostendetur, degenerans cachexiam paulatim inducet, verumque Hydropem excitabit, *Cachexia enim Hydropis initium est*, ut testatur Aegineta. [l] Hic verò sese spontè obviam facit

(k) Lib. 4. Cap. 19.

[l] Lib. 3. Cap. 47.

facit universalior quædam ejusdem Hydropis causa, in qua generaliter statuenda, & veteres, & recentiores Medici unanimi Sententiâ consentiunt: Ea est sanguificatio læsa, seu prava quædam Sanguinis conditio, per quam Chylus in perfectum Sanguinem abire nequit; Cùm etenim a veteri sanguine novus, ex Chyli materiâ, ope Spirituum, generetur Sanguis, si id præstare quandoque non valeat, universus Hæmatoseos ordo turbabitur, & per arterias, ac venas cruda, imperfecta, & enervis humorum massa veriùs, quàm vividus, & ritè elaboratus sanguis excurret. Ita autem si Sanguis ipse afficiatur, crudis, aquosisque humoribus infarctus eos a se facile eliminabit, & a mixtione solutos in libertatem asseret, unde prava corporum constitutio, ac demùm Hydrops confurget. Verùm de ipso sanguificationis opere, & periculis ab eadem læsâ convenientibus fusiùs in capite sequenti differendum nobis erit, cùm scilicet de Hydrope ab hæmorrhagiâ immodicâ genito loqui continget. Et profectò a qualibet ex recensitis causis Hydropem produci posse, & non rarò fortasse produci, nemo sapiens rerum æstimator ambiget, immò, si aliam Hydropis causam addere libeat, licèt ea nil tale minitans, aut saltem remotior, primo aspectu, videri possit, re attentius examinatâ, non inanis omninò videbitur, & contemnenda; Insensilis itaque perspiratio prohibita ea est, quam modo in culpam Hydropis vocare juvat, & ab unico hoc fonte morbum hunc derivatum aliquando, vel saltem derivabilem affirmare.

D

Ut

Ut autem res clariùs pateat, exactissimam Sanctorii
 trutinam præ manibus geramus parumper, ut ejus
 ope, pondus particularum a nobis continuò erum-
 pentium innotescat, comperiemus etenim quinque
 circiter libras, unius diei spatio, quicquid transpira-
 mus pendere: Et hæc quidem insensilis transpira-
 tio necessarissima est, ut Animalis vita conservetur,
 quemadmodum inter cæteros manifestissimè demon-
 stravit clarissimus Borellius, [*m*] tali enim pacto,
 vapores pravi, & inutiles a nobis expelluntur, no-
 xiæque particulæ per poros eliminantur; Si verò
 halitus isti vaporosi a sanguine ebulliente, & undi-
 que fermentescente, & in motum acto discedentes
 exhalare nequeant, vel ob restrictionem pororum,
 vel ob quodcumque aliud impedimentum transpira-
 tionem prohibens, suspicandi sanè locus erit a va-
 poribus iisdem intus condensatis, & in aquam dege-
 nerantibus Hydropem excitari. Plura hoc suadent
 exempla, quorum primum desumi potest ab Alem-
 bicis, ut vocant, distillatoriiis, in ipsis enim, cum
 ope ignis elevantur vapores ex floribus, aut aliis
 humidis Corporibus extracti, concrescunt paulatim,
 addensantur, & in aqueum humorem resolvuntur:
 Idem accidit, cum vapores sublati in sublimem æ-
 rem in pluviam deinde abeunt, quemadmodum mi-
 hi ipsi observare olim contigit, cum lacus quosdam
 in Volaterrano Solo integram occupantes vallem,
 & lacus magnos a vicinis Incolis appellatos inspice-
 rem,

rem, ab aquà enim in iisdem immaniter æstuante,
 & in perpetuam ebullitionem actà fumum quèn-
 dam densissimum sursum elevari vidi, eumque in-
 veram assidue pluviam descendere, adeo ut ex nun-
 quam intermisso aquæ depluentis proventu, rivus in
 imà vallis parte confurgeret satis uber, aspectu ta-
 men horridus, & gravissimo odore intolerabilis, &
 fugiendus. Verùm licet quæcumque ex causis hùc
 usque enumeratis Hydropem producere singillatim
 valeat, poterunt non minùs aliquando plures simul
 ad noxiam morbi hujus productionem concurrere,
 unde tunc effectus facilior, & periculum majus ori-
 ri poterit; Neque ab his tantùm proximioribus cau-
 sis totus Hydropis timor, sed eundem, licet fortasse
 remotiorem, excitare poterunt causæ quædam diffi-
 tæ magis, & à quibus minùs timeri communi-
 tèr solet: In harum propterea considera-
 tione aliquantulum etiam immora-
 bimur, ut pleniorẽ Hydro-
 pis, ejusque causarum co-
 gnitionem, quantum
 fieri potest,
 attingamus.





Quomodo ab Hæmorrhagia immo- dica Hydropis periculum in- duci possit.

C A P. V.



INter veteres Philosophos non defuerunt, referente Aristotele, qui sanguinem animam esse affirmarent, adeò penes illos sacra res erat sanguis, ut a præclarissimarum ejusdem conditionum consideratione decepti ipsum tanto nomine, ac tam eximia dignitate decorandum censuerint; Detur hoc vel miseræ temporum illorum caligini, vel quorundam Hominum animo nimium liquidi hujus, & ultra moderationis leges amanti: Quantò tamen falsum, ineptumq; videtur hujusmodi Philosophantium effatum, tantò consonum veritati est nos uni debere sanguini, quòd vivamus, & hoc nostrum sentire, ac moveri ab ipso esse, provenire ab ipso, & ab eodem servari; Irrorantur enim a sanguine quæcumque Corporis partes, non tanquam a torrente, qui secum obvia quæque rapiat, sed veluti ab amico flumine, quod limosis arenis dives iisdem margines munificè vestiat, & ripas: Nutrit nempe cruor, dum flu-

fluit, & tot, ac tam diversis alendis partibus unus ipse sufficiens omnibus assimilatur, dum omnes reficit; Sic unus etiam fons ille est, qui in horti medio profiliens, læto murmure, variisque rivulis herbas alluit; attamen, licet solus, universam florum familiam irrigans, & fovens, hinc in violis pallefcit, ibi albicat in liliis, in rosis alibi rubet, & amaranthis: Verum sanguinis latex, licet ad præstantissimos usus destinatus, nisi aliquando cautè minuere-
tur, degener, & sui muneris immemor sanitatem ipsam non rarò opprimeret, quàm sustinere, diùque incolumem servare debuisset; Hinc criticas moliri hæmorrhagias natura didicit, quæ vel vagæ, ac incertæ sunt, vel periodicæ, ut fluxus muliebris, atque aliæ in nonnullis vasorum apertiones, & quæ in ipsis febribus crises sanguineæ interdum contingunt, a quibus morbos sæpè judicari, & Hippocrates, & vulgaris experientia testantur: Ut plurimum verò, quemadmodum Villisius (n) asserit, circa Hæmorrhagias spontaneas, vel criticè institutas delinquitur, aliquandò etenim vasorum ora semel aperta hæud denuò statim connivent, aut occludi possunt, unde contentus sanguis intemperantiùs erumpere, & copiosiùs effluere cogitur: Si ita si res habeat, hujusmodi hæmorrhagia jam non ampliùs critica, & laudabilis appellabitur, sed symptomatica, & noxia sanitatem semper, ac sæpè vitam evertens; Fieri enim aliquando poterit, ut immanior sanguinis effluxus
nun-

[n] *De Remed. Sang. Risten. Sect. 3. Cap. 2.*

nunquam penitus cesset, donec in ultimum exitium vitam ipsam adduxerit, immò si quandoque cruentum gurgitem cohibere liceat, non semper de insperata valetudine diù lætabitur æger, magnam etenim hæmorrhagiam non rarò excipit Hydrops, & post immodicè amissum sanguinem, immodicæ colliguntur aquæ. Et hoc quidem evenire testantur Medici omnes mille passim in locis, & præsertim Galenus, *cum supra modum*, inquit, *aut ex utero muliebri, aut a venis, quæ hæmorrhoides appellantur, aut ex ulcere fluxerit sanguis, tunc nonnulli aqua inter cutem corripuntur.* [o] Verùm si nosmetipsos consulamus, quid ægris nostris, post largam sanguinis effusionem acciderit memoria repetentes, id ipsum, fortasse expertos esse recordabimur, de quo, suis etiam temporibus, veteres Medici querebantur. Et quidem quem non movemus lapidem, quoties hæmorrhagia immodica occurrit, quid intentatum relinquimus, ut cohibeatur quod fluit, ut reparetur quod fluxit? In promptu nobis sunt alchalia mille, revulsiones innumeræ, & adstringentia, totamque hisce præstantissimis auxiliis periclitantem sanitatis causam commendamus: Omni interea studio, omnique curâ ægrum enutrimus, statis reficimus intervallis, & salubri, parco tamen semper ciborum apparatu, virium jam jam labantium ruinam fulcire nitimur, ne cum ægroti vitâ penitus corruant: sed rarò nimium tot laborum segeti matura messis respon-

spondet, licet enim, scite dispositis aggeribus, sanguinis diffluentis torrens aliquandò coherceatur, prohibere vix poterit Medicus, ne extra vasa feratur lymphæ, & qui multum cruoris amisit naufragam, videat in aquis vitam, quam cum sanguine lapsuram timuerat. Hinc duplex ab Hæmorrhagia immodica periculum, primum scilicet a sanguinis eruptione nunquam cohercitâ, secundum ab eadem prohibitâ demum, ac repressâ, Hydropi tamen homines damnante portenditur. Quoad primum, exitii, quod irreparabile emanat ab hæmorrhagia nunquam impeditâ adeò manifestè patet fatalis causa, ut supervacaneum omninò sit in eadem exponenda diutius immorari, constat etenim ab assiduâ sanguinis deperditione paulatim imminui, ac tandem tolli momenta contractionum in villis cordis, ac propterea a motu demum cessare, & a vitâ deficere. Quod verò ad secundum spectat, quâ nam videlicet ratione contingat, ut post insignes sanguinis eruptiones tam facilè oriatur Hydrops, aliquid hîc nobis occurrit non ita fortasse planum, ac pervium, sed altiori indagine prosequendum, ut facilius, & securius investigetur, oportet enim ut ab Hydrope nostro parumper discedentes ad abstrusiora nature mysteria breviter scrutanda transeamus. Præclarissimum itaque sanguificationis opus, seu spectetur in Embryone, antequam sanguinis vestigium appareat, seu in adultis, postquam sanguine turgent vasa, magnum semper, ac semper mirabile quo ordine, quâvè lege contingat ex recentiorum observationibus
adeò

adeò patet, ut jam satis superque discissum sit velum illud, a quo incomparabilia Naturæ arcana, tot seculis occultata latuerunt. Primo igitur, ut res in meliorem lucem vocetur, ad examen revocare libeat quid liquori genitali, seu colliquamento candido in ovo accidat, dum incubatur, purior etenim colliquamenti pars a mixtione aliarum partium ovum constituentium recedens se in centro colligere comperietur, ibique postquam sedem fixit, varia inde ad circumferentiam, & varia insuper a circumferentiâ ad centrum, ubi punctum saliens, filamenta diffundere, atque hæc non nisi rivuli sunt, & canaliculi, per quos purissimus liquor, simul cum vitali spiritu, medium colliquamenti tenens per universam ejusdem regionem spargitur, ac deinde per alia vasa ad suum centrum revertitur: Hi autem ductus in veras paulatim arterias, verasque venas abeunt, per quas liquor idem vitalis suum circulationis motum init, & ab eodem, dum vita superstes est, nunquam desistit. Postquam verò humor ille suam circumgyrationem instituit, ad circumferentiam colliquamenti, ubi videlicet Chorion est, aliquid purpurei subnasci aspicitur, succo nimirum vitali, dum circulari per ipsum colliquamentum motu voluitur, in ejusdem margine, seu peripheriâ sanguineum colorem paulatim assumente: Chorion itaque, seu tenuis illa tunica, totum colliquamentum ambiens prima rubri sanguinis sedes est, ibique vitalis liquor primum sanguinis colorem, & formam induit, cum etenim membranula
 illa

illa, ratione situs, incubationis calorem prius senti-
 at, exterior enim est, & colliquamento superstrata,
 rursusque ad illam facilius a centro, & expeditius
 vitales undequaque ferantur influxus, hinc fieri for-
 tasse debuit, quemadmodum inter cæteros oculatissi-
 mus Harvæus, & clarissimus Charletonius, suspi-
 cantur, ut non in ipso puncto saliente, sive in ipso
 Corculo primò spectandum sese offerret sanguis, sed
 tantum in Chorion. Hinc igitur patet sanguificatio-
 nis opus non esse ipsius Cordis, cum non nisi poste-
 rius ibidem sanguis appareat, & in ipso manifestus
 tantum fiat, postquam in colliquamenti margine
 purpurascentem colorem exhibuit. Non minus etiam
 ab hisce observationibus evincitur aut Hepar, aut
 aliud quidquam ex recensitis a veteribus Medicis he-
 matoseos organum sufficiens non esse, & aptum opi-
 ficem, sed præclarissimam sanguinis fabricam aliun-
 de petendam esse, a liquore scilicet illo purissimo,
 vitalique spiritu in media colliquamenti parte, ut-
 potè digniori sede primo hospitantibus. Quæ omnia,
 cum manifestè pateant, jam non amplius dubitatio-
 ni locus erit ab eodem sanguine, etiam cum adultus
 per vasa decurrit, novum sanguinem e Chylo effor-
 mari, & depeditiones, quas continuas patitur, no-
 vo sui ipsius proventu compensari; Idem enim vi-
 talis spiritus, qui primum gignere potuit sanguinem,
 dum adhuc sanguis nusquam in ovo conspiciebatur,
 in eundem sanguinem deinde transiens veteri activi-
 tate præditus eandem illi communicabit, quemad-
 modum vitali succo, seu puriori colliquamenti par-

ti sanguificandi facultatem in ovo communicaverat. En igitur quam facilè explorari possit cui nam debeat in adultis Chyli in sanguinem conversio, cum etenim primum in Embryone a spiritu vitali ex candida, puriorique colliquamenti parte purpureus, verusque sanguis felicissimè efformetur, non dissimiliratione, per totam Animalis vitam, idem se geret spiritus albam Chyli substantiam in rubrum sanguinem transmutando, idem etenim spiritus est, vel cum in ipso vitæ exordio puriorem colliquamenti partem inhabitat, vel cùm, in ejusdem progressu, in sanguine sedem figit, immò potentior, vegetiorque in dies evadens, quousque Animal ad ætatis, viri-umque acmen pervenerit, faciliùs opus suum exequetur, magisque sanguini conficiendo idoneus fiet. Quoniam verò purissimus liquor in ovo a spiritu vitali continuò agitato, & in motum actus sanguinem paulatim efformat, manifestum est non solo spiritu, & solo ejus influxu opus esse ad sanguificationem absolvendam, sed & motu in ipso liquido, ubi ejusdem spiritus sedes est; Hanc autem necessarissimam conditionem sanguini non deesse, satis, superque compertum est, sive de intrinseco ejusdem sanguinis motu, sive de extrinseco ratio haberi velit, novimus enim omnes, particulas sanguinem constituentes in continuà agitatione, & commotione esse, atque inter se ad invicem niti, ad invicem premi, & in assiduà contentione, & quasi tumultu persistere: Constat ulteriùs totam ejusdem sanguinis massam
motu

motu circulari indefinenter cieri, & a corde ad quascumque Corporis partes fluere, ab iis verò ad Cor ipsum reverti, undè duo isti motus sanguinem nunquam quiescere sinunt, & si perpendantur attentius, licet specie, ortuque diversi sint, sese invicem adjuvare, & ad unum, eundemque finem conspirare, comperientur. Quid ergò de sanguine dicendum, cum adultus, vivido spiritu dives, mobilisque adeo, & sese undequaque adeo movens per vasa decurrit, nisi quod dici de eodem debuit, cum puriorem colliquamenti partem præseferens, & a vitali spiritu intrinsecè agitatus ab ipsius colliquamenti centro ad ejusdem marginem, & e contrà, alterno, & mirabili motu ferebatur? Tunc autem a liquore illo purissimo sanguificationis opus absolvi vidimus, idem igitur a nostro sanguine, immo etiam felicius præstabitur, quoniam in ipso uberior spirituum copia hospitatur, & in majores, validioresque motiones venire non desinit. Chylus ergò cum primo sanguinem subit, non statim perfectus fit sanguis, sed ab eodem pervaditur paulatim, dissolvitur, sibi que tandem assimilatur, proprio scilicet spiritu, motuque adjuvantibus; Atque hinc fortasse pronum foret colligere, cur sanguis duci debuerit in pulmones, antequam per arterias ad partes derivaretur, aer enim, qui in folliculis pulmonaribus continetur, in ipso respirationis motu, cum scilicet iisdem pulmones restituantur, mirum quàm urgeat, & quàm nitatur in canales sanguiferos ad eorundem folliculorum superficiem excurrentes, unde ex hac pressione in vasa, &

consequenter in contentum sanguinem Chylo permixtum oritur facilior ejusdem solutio, & in minimas particulas divisio, seu facilior in perfectum sanguinem transmutatio; Conferre pariter ad hujusmodi dissolutionem dicuntur ipsæ arteriarum ramificationes, earumque bifurcationes vim quandam in liquidum per eas fluens exercere non dissimilem cuneorum viribus, ut præteream pressionem muscutorum, aliaque quam plurima ad minimarum sanguinis, aut Chyli partium perfectiorem divisionem facientia. Verùm hæ omnes auxiliatrices sunt causæ, & ad sanguificationis opus tantummodò concurrentes, verus nimirum, & unicus Hæmatoseos fabricator, & sanguinis pater sanguis est, qui de propria conservatione sollicitus Chyli substantiam in sui ipsius substantiam transmutat, eundemque permeando, & ad ultimam usque divisionem dividendo, subigit tandem, & sanguinem facit; Attamen veluti in ovo quantitas purissimi liquoris sese, spiritus vitalis ope, moventis excedit mirum in modum primum illum sanguinem, qui ad colliquamenti circumferentiam aspicitur, cùm ex Harvæi testimonio (*p*) exilissima tantùm linea sit, quæ primo purpurascit, ita in adultis necesse est, ut veteris sanguinis quantitas novi sanguinis efformandi quantitatem maximo superet excessu, alioquin Chyli substantia non modo in sanguinis substantiam nunquam faceretur, sed veteri ipsi sanguini quod crudum, imperfectumque in se

con-

[*p*] *De Gener. Anim. Exerc.* 17.

continet Chylus communicaret potiùs, & universus
 interim Hæmatoseos ordo, & successiva sanguinis re-
 generatio corrueret. Quicquid ergo hanc tollet pro-
 portionem, de quà loquimur, & quæ necessario in-
 ter Chylum, & sanguinem intercedere debet, non
 solum perfectam Chyli sanguificationem impediet,
 sed ulteriùs imperfecta Chyli substantia sanguinem
 ipsum inficiet; Et hoc quidem ab Hæmorrhagiis
 immodicis præstari facilè posse manifestum est, quo-
 tiescumque ita ab iisdem depauperatur, & imminu-
 itur sanguinis latex, ut Chylo in propriam substan-
 tiam transmutando jam non amplius apta quantita-
 tis proportionem respondeat, ac propterea in crudum
 quid, effœtum, & spiritibus magnà ex parte desti-
 tutum degeneret: Sanguis verò tam pravæ indolis,
 ac tam imperfectæ conditionis vel obstructions in
 visceribus excitabit, undè aquosioris ejusdem partis
 extra vasa diffusio, vel lassus nimium, nimiumque
 enervis quod dissolutum magis, magisque lymphaticum
 est a fibrosarum ejusdem sanguinis partium
 vinculo solutum, quà dabitur via, fatali libertate
 finet effluere, ac propterea ex utrâque causâ Hy-
 drops consurgere, & in manifestissimum vitæ discri-
 men adduci Homines poterunt. Patet igitur, ex di-
 ctis, cur immodicis Hæmorrhagiis tam sæpè subse-
 quatur Hydrops, cum etenim ab iisdem minuatur
 intemperantiùs sanguis, sive id, a quo Chylus in-
 perfectum sanguinem commutari deberet, naturalis,
 & laudabilis sanguificatio non continget ampliùs, &
 tota paulatim sanguinis massa vitiabitur, & flaccescet,
 plu-

pluresque interim vias, easque planas nimium, nimiumque faciles Hydropi sternet. Hoc autem totum a Phænomenis, quæ in hæmorrhagiis curandis observantur, manifestissime comprobatur; Si enim sanguinis effluxum sistere quandoque detur, ut ab Hydrope, ad quem post cruenta hujusmodi impendia inclinantur vindicare Homines possimus, necessariam experimur parcissimam victus rationem, adeo ut non nisi a paucis cibi unciis per intervalla, nutriatur æger, pluresque aliquandò menses transigat semper famelicus, & semper in obstinata, salubrique ciborum penuriâ persistens; Et quidem hoc unum est, quod tunc a manifesto Hydropis periculo Homines aliquando liberat, nosque a morbi hujus suspitione, post crebras, aut immodicas Hæmorrhagias, curatos plerosque novimus per hanc solam in cibo eis ministrando quasi crudelem methodum, & rigidam parsimoniam: tali etenim pacto sanguis ab hæmorrhagia residuus non superatur, & quasi obruitur a magno Chyli proventu, unde in crudam, hebetem, lassamque substantiam degeneret, sed Chylum ipsum utpotè paucissimum commodè subigit, & in verum, perfectumque sanguinem convertit. Utinam ergo ea semper per arterias vividi, & perfecti sanguinis quantitas fluat, ut vividus, & perfectus inde progigni sanguis, ac nostræ diù vitæ consulere valeat, quicquid etenim veteris cruoris nimium absumet laudabilem sanguificationem impediet, ac totam paulatim sanguinis massam ita afficiet, ut Hydrops inde timeri non immeritò possit. Hactenus de hæmorrhagiâ

in-

involuntarià , quæ scilicèt spontè contingit , & si immodica sit , periculis Homines onerat , jam proximè incumbit ad voluntariam sanguinis effusionem , sive ab arte quæsitam transire ; Hæc autem Phlebotomia est præclarissimum illud præsidium , magno Medicorum consensu , & magno Hominum bono institutum , cujus ope , mirum , quot deleti sint morbi , quot morti erepti , suæque redditi sanitati ægrotantes . Præstantissimum hoc remedium in promptu fuit Veteribus penè omnibus , ut eorum monumenta testantur , & ut à Galeno ipso in libro , quem peculiari-ter de Phlebotomia conscripsit , satis , superq; ostensum fuit ; Hæc eadem medendi ratio jam usque a primis ducta seculis ad nostra descendit tempora , in quibus pari excipitur cum laude , paremque fructum , si celebretur , promittit ; Verùm quemadmodum aliquandò hæmorrhagiæ , quas natura ipsa promovit , si immodicè durent , Symptomaticæ , & pravæ fiunt , ita etiam sanguinis emissiones , quæ ab arte præscribuntur , si intemperantiores sit , in noxias , & funestas quandoque degenerant , quocumque enim modo minuatur sanguinis latex , si ad eam diminutionem pervenerit , per quam sanguificationi ineptum fit , eadem hydropis suspicio vigebit , & idem periculum ; Et profectò hoc semper in mente gerant oportet Medici , quotiescumque venæ sectionem præscribunt , ne immodicum sanguinem educentes de immodicè collectis aquis in culpam vocentur , non etenim semper frequens adeò , & adeo abundans sanguinis missio convenit , ut turpe videri debeat mori , nisi priùs mor-

morti ipsi magno cruoris pondere litatum sit. Utinam tamen artis nostræ res, vel a primis ejus exordiis, eadem perspicacitate, & prudentiâ tractatæ fuissent, quâ nunc a doctissimis viris, & peritissimis tractantur, verùm uti Cæsares paucos multa viderunt sæcula, paucosque Alexandros, ita etiam magna quidem, & fulgidissima Medicinæ lumina; sed rara nimium prisca vidit ætas, nostrisque dumtaxat temporibus, ac præcipuè Urbi nostræ gratulari jure possumus, quod hîc, singulari Medicinæ gloriâ tam multos invenire liceat, quibus sapientum, ac prudentissimorum Virorum nomen meritò debeatur: Iis itaque eâ, quâ decet existimatione prosequitis, & sermone ad illos converso, qui ex istorum censu non sunt, primò ipsos monitos velim, me nunquàm a missione sanguinis abhorruisse, eandemque me nunquàm, ut arbitror, improbatum, mihi etiam laudibus ipsam excipere placuit, ipsam, quando res exigit, ægris præscribere, & ipsius ope morbos fortiter aggredi, & debellare feliciter. Quod nunquam in animum inducere potui illud est, quod audent plerique, in cujuscumque scilicet sanguinem sævire, sit æger ille, sit sanus, sit gracilis, sit robustus, æstuet adolescens, vel senex algeat. His mente excidisse arbitror quæ phlebotomiam celebraturis documenta reliquerit Galenus, licet ipse adeò venæ sectionis amans fuerit, ut damnatum Erasistratum voluerit, hoc solo de nomine, quod de sanguinis missione parum disseruerit. Porro, inquit Medicus ille præstantissimus, *si atate nec puerili*

vili sint, nec senili de secunda venâ consilium inito, præ oculis habens principales hosce scopos, nempe plenitudinis tum quantitatem, tum qualitatem, & virium robur, atque infirmitatem: Deinde naturalem totius Corporis habitum, tempusque, & regionem, vitamque antea actam, tum an cibi, potusque copia, & præcipue affatim nutrientium qui sic affectus sit, sit usus; Ad hæc consuetudinem, & res præter consuetudinem actas, quosque motus exercuerit, quas excretiones habuerit, aut præter solitum compescuerit; Ad omnia autem hæc, num gracilior, aut crassior evaserit, (q) Huc usque Vir peritissimus. Unde igitur tam impatiens cogitandi animus, cum Galenus ipse tot cogitandi suppeditet argumenta? Si hæc omnia, quæ superius recensuimus ea, quæ par est, curâ, studioque perpenderentur, melius fortasse consuleretur ægris, suoque sanguine exhausta Corpora inciperent displicere; Attamen invaluit adeo, tantumque roboris adepta est cruenta hæc medendi ratio, ut jam cætera penè omnia Medicinæ præsidia negligent Medicorum plerique, unâ, sed non unicâ sanguinis missione contenti. Majoris ergo pretii apud nos ipsos sit sanguis, nec in eodem adeo largè mittendo, nisi æqua urgeat necessitas, tam crudeli libertate abutamur. Capiti per unicam diem, & non graviter dolenti liceat, si Medicum adeat, incidendæ venæ sententiam effugere; Infans non satis adhuc doctus lac è mammis sugendo eligere, Senex decrepitam agens vitam, debilis, effœtus, & languidus


F

dus

(q). *De Cur. Rat. per Sang. Miss. Cap. 6.*

dus, quàcumque levi de causà, ad poenam sanguinis
 non damnentur, alter, cùm vix vivere cæperit, al-
 ter, cùm jam cæperit mori. Verùm quo me non-
 iustus rapuit dolor? Tunc rationi consentaneum
 queri foret, cùm haberet undè de Medicis querere-
 tur Ars nostra, sed ea inest doctissimis Viris, & pe-
 ritissimis solida virtus, & sapiens, ut ab iis non ni-
 si cauto, prudentique consilio sanguinis missio præ-
 scribi possit; Ab iis exactè perpenduntur omnia,
 ætates, vires, temperamenta, & morbi, temporum
 constitutiones, & Corporum, neque præclarissimo
 Artis auxilio intemperantèr uti noverunt unquam,
 aut unquam discent. Hunc fortasse de se timorem
 aliqui facient, qui nil Philosophi, ac Medici, ultrà
 propriam jactantiam habentes, & ultrà nomen, den-
 sisque undique inscitix tenebris involuti, nullà aut
 ægritudinis ratione habità, aut ægrotantis, sanguinis
 missionem utcumque celebrant, & multis utcumque
 vicibus repetunt. Hos igitur unicè huc usque sermo
 noster admonuit, ut sanguinis amantiores eidem ma-
 gis aliquandò parcant, ne manifestum Hy-
 dropis periculum subeant homines, si eorum sanguinis latex quàm-
 cumque de causà im-
 modicè minua-
 tur.





Quomodo a largis Potationibus non levis Hydropis suspi- cio oriri possit.

C A P. VI.



Ac lege vivimus omnes, ut a con-
tinuà partium deperditione dissi-
pemur semper, & destruamur, vi-
resque proinde nostræ corruant
statim, & vita deficiat, nisi nu-
tritionis ope quicquid necessariò
amissimus providè restauretur, ab

operibus enim, in quibus obeundis tantùm natura
impendit, corpora ad extremum exitium citò perdu-
cerentur, nisi id, quod assiduè perit assiduè refice-
retur, & maximam spirituum jacturam nova eorun-
dem reproductio compensaret. Oportuit propterea
Chylum in ventriculo elaborari, per vias peculiare
in sanguinem ire, ac demùm ejusdem operà sanguis
& ipse fieri, unde per universum Corporis ambitum
latè diffusus omnes irroraret partes, omnibusq; con-
grui alimenti vectigal afferens vitam regeret, sani-
tatemque servaret. Quoniam verò Chylus ipse, a quo

tantum sperare licet, non spontè in ventriculo nascitur, sed hujusmodi vitalis laticis, nisi illuc aliundè derivetur, sunt sthomachi tunicæ omninò infœcundæ, necesse fuit, ut eidem Chylo producendo materia sufficiens accederet, cibus videlicèt, qui primum in ore ruditer comminutus, ac per æsophagum in sthomacum ductus, acidi fermenti ab ejus glandulis continuò stillantis auxilio, in Chylum paulatim facesseret; Atque hinc oritur necessarius cibi usus, cùm ab ipso, post varias fermentationes, variosque gyros, consurgat tandem sanguis ipse maximus ille Corporum servator, vitæque custos. Verùm quid sanguinis a solo cibo, si crassus semper, compactusque in ventriculi membranas descenderet, hauriret natura, nisi quædam eidem cibo fluiditas adderetur, unde cibaria solida ingesta dilui, effluere, & macerari possent? Hinc itaque emanat magna potius necessitas, qui videlicèt arido permixtus cibo ipsius macerationem adjuvet, unde ejusdem fermentatio, & in minimas quascumque partes dissolutio facilior. Non unicè tamen chylicationi promovendæ intervit potus, sed rursus Chylum ipsum mobiliorem facit, & fluxiliorem, ut per angustias vasorum, a quibus excipitur, excurrere faciliùs valeat, quod præstare non posset, si humido hoc vehiculo destitueretur, testis etenim Borellius est [r] arenæ acervum aridum insinuari, fluereque non posse per canales angustos, nisi a copiosa aqua admixta lubricamur.

(r) De Oeconom. Anim. par. 5.

eam consistentiam acquirat; Ipsæ insuper ventriculi
 tunicæ, ut ad motus, & expressiones efficiendas apte
 sint, madefiant oportet, & a noxiâ ariditate per po-
 tum vindicentur, ut prætereamus ipsis excrementi-
 tiis fœcibus hinc lubricitatem etiam addi, ut extrâ
 Corpus, per intestina, facilius eliminentur; Famis
 propterea stimulo sitis sensationem natura copulavit,
 ut ad eam sedandam, totque simul nos bonis cumu-
 landos, quâdam quasi violentiâ impelleremur: im-
 mō, ut major bibendi nos amor teneret, ipsam sitis
 extinctionem mirâ jucunditate condivit, adeo ut po-
 tus idem, dum sensum dolorificum a siti productum
 aufert, & destruit, suavissimâ insuper gustum dele-
 ctatione mulceat, & recreet. Hinc factum fortasse
 arbitror, ut tam magna potus beneficia examinantes
 nonnulli, majori ipsum, quàm par est, veneratione
 prosequi, & intemperantiùs amare didicerint, licet,
 re maturiùs perpensâ, non à quocumque potus ge-
 nere, neque a quâcumque ejusdem copiâ fructus
 adeò felix portendatur, sed tantùm a potu indolis,
 & conditionis innoxie, & cujus usus moderationis
 leges, & temperantiæ fines nunquam excedat: Aqua
 scilicet ipsa, ut in præsentî de hac unice loquamur,
 ea enim nil simpliciùs arbitratur, & nil securiùs, si
 ipsa immodicè utamur, salubris esse cessabit, & bo-
 na corporibus a potu promissa in damna non rarò,
 & funestissima exitia degenerabunt; *Labor enim*, in-
 quit Hippocrates. [*f*] *cibus, potus, somnus, Venus om-
 nia.*

(*f*) *De Morb. vulg. lib. 6. sect. 6.*

*nia mediocria. Non concoquit Animal, asserit Gale-
 nus, (t) propter cibi, ac potionis immodicam copiam,
 & Avicenna (u) integrum libri caquit de nocumenta
 potus plurima aqua a se inscriptum legendum exhibet.
 Oportet igitur, ut clarissimorum Virorum præcepta
 libenti, gratoque animo excipiamus, insignes vel
 aquarum potatores admonentes, ne iis nimium in-
 dulgeant, & in potu ipso, quem insanè depereunt
 sanitatis naufragium faciant, & vitæ. Ipse quidem,
 ex quo tot gliscentes Hydropes, totque funestissimo
 hoc morbo elatos vidi, largiores potationes timere
 cepi, mecum ipse sæpè cogitans, nùm fieri posset,
 ut a nimia in bibendo intemperantiâ aliqua hydro-
 pi producendo opera tribueretur, & profectò si quæ
 immodicas potationes consequuntur attentius per-
 pendantur, magnus aderit dubitandi locus Homines
 iisdem indulgentes facilius aqueo morbo obnoxios
 fieri. Primò enim statuamus oportet obsolevisse jam,
 & ab omnibus rejectam esse eorum Sententiam, qui
 potum a ventriculo per somniatam quandam semi-
 tam, brevissimo cursu, ducebant ad renes, cum in-
 terim luce ipsà clariùs pateat, unicam ad eosdem
 renes viam esse, vasa scilicet sanguifera, sive arterias,
 ac proindè liquida, quæ bibendo hauriuntur, ante-
 quam per urinam a Corpore educantur, transire,
 non minùs, quàm Chylus reficiendo sanguini desti-
 natus in vasa lactea, in thoracicum, in subclavias,*

in

[t] *De Sympt. Caus. lib. 3. Cap. 1.*

(u) *Tract. 5. Cap. 5.*

in sanguinem, atque in hac vulgatissimâ opinione,
 & veritati maximè congruâ nequeunt non esse Me-
 dici penè omnes, cùm penè omnes aquis largissimè
 exhibitis, febres obruant: Si enim illos quis inter-
 roget, cur febricitantes tot potationibus impleant,
 urget febris, respondebunt, ignis scilicèt, aut, si
 quid igne igneum magis est, ardet in sanguine, ve-
 luti igitur, multis aquis, magna etiam extinguuntur
 incendia, ita magnæ pariter febres pleno aquarum
 gurgite extingui poterunt: Iis ergo animus est, tot
 aquarum auxilio, sanguinem ab ardore, quo æstuat,
 vindicare, quòd nunquam præstare se posse spera-
 rent, nisi constanter crederent in sanguinem abire
 quod bibitur, & cum ipso per venas fluere, & per
 arterias. Rursus memoriâ repetendum quid superio-
 ri capite ostensum fuerit, a veteri scilicèt sanguine
 novum sanguinẽ efformari, atq; hinc propterea oritur,
 quod si Chylus a sanguine subigi nequeat, frustra san-
 guificatio expectetur, immò sanguis ipse, licèt, ante
 hujusmodi Chyli adventum, optimis polleret quali-
 tatibus, pravis conditionibus inficietur, noxiaq; illi
 ejusdem Chyli natura communicabitur. Quid igitur
 aliud vaticinari sibi poterunt potatores nostri, quàm
 proprii sanguinis damna, propriæque sanitatis per-
 niciem, eo majorem, & proximius imminentem, quò
 intemperantiùs potaverint? Cùm etenim spiritus in
 veteri sanguine hospitantes determinatæ activitatis
 sint, & virtutis, si ad novum gignendum sanguinem
 non sufficiant, quod ex admixtione veteris sangui-
 nis cum novo Chylo resultabit, sanguis quidem erit
 sed

sed imperfectus, & Chyli prædominantis naturam induens. Hinc si crassæ conditionis, ac viscidæ sit ipse Chylus, crassior pariter, viscidiorque confurget sanguis, si verò tenue, dissolutumque sit quod in eundem transit, tenuis non minùs fiet ipse sanguis, & dissolutus; Quid verò potationibus ipsis, ac præsertim aqueis, aut aqueam naturam redolentibus tenuius, & dissolutius excogitari potest? Ab iis igitur mirum in modum dissolvetur sanguis, & quò intemperantiores erunt, eò majorem in eodem dissolutionem excitabunt, adeoût iis affectionibus, quorum a sanguine nimium dissoluto origo est, potiores insignes obnoxii fiant: Hydropem autem a sanguine hujus conditionis non rarò produci quis est, qui non noverit, præsertim, si potationes, quibus plerique indulgent, immodicæ verè sint, & sanguinem immodicè dilutum, enervem, crudumque faciant. Et profectò quid aliud tam amplius, turgidusque torrens, qui liber magnà ex parte, & effrænis per vasa corporis fertur, portendere nobis poterit, quàm disruptiones riparum, a quibus coerceri debuerat, præcipuè si debiles aliquæ ex ipsis sint, & parùm magnis undarum insultibus resistentes? Vasa itaque lymphatica, utpotè exilissima, & tenuissimis membranulis, fibrillisque constantia, quomodò aliquandò non diffringentur, si a majori, quàm par est, liquidi copià sæpiùs impleantur? Nimium tamen, & ultra moderationis leges territi ab hujus periculi consideratione videntur fuisse non vetustorum tantum, ed & quasi nostrorum temporum Medici; Nondum enim

enim decrepitam agunt vitam hominum plerique, & se, non quidem de tantà in bibendo intemperantià, sed de paucis aquæ guttis avidè haustis increpatos aliquandò fuisse, etiam cum febrili æstuarent igne, recordantur. Jacebant in lecto Miseri maximà febre jactati, summà etiam æstate, aridis faucibus, asperàque linguà, crebrum anhelitum ducentes, & ferè vidum; Ingenti ardebant interea siti, & expressis undique ab intùs latente flamma sudoribus, ardor crescebat, & siccitas, suspiria iterabantur, & jactationes. Qualia tunc infeliciùm vota, quales preces, ut paucos aquæ haustus à Medico exorarent, donum, penes illos tanti ponderis, ut mori se posse dicerent, tam duram ferre sitim non posse! Actum tamen de illis dicebatur si biberent, atque eorum etiam oculis aqua subducebatur, ne privationis pœnam vetiti liquoris aspectus augeret, & satis tanto ardori Medicis videbatur consultum esse, si frigida summis tantùm labris madefactis, miserorum sitim fallerent potiùs, quàm solarentur. Ego autem nequeo sine horrore de infelicissimà tunc temporis febricitantium, conditione recordari, cum solo tunc nomine discrepasse videantur Ægypti, Lybiæque deserta, & ægrotantium cubilia, in his enim non minùs in obstinàtà aquarum penurià, & intolerabili æstu, cum siccitate luctandum erat, & cum ardore. Attamen crudeles adèd Medicorum animos tunc fuisse existimandum non est, ut febricitantium restiterint precibus, quasi ægrorum oblectarentur luctu, eorumque gauderent in pœnis, sed rigidæ hujus interdictionis in

culpam potiùs, ut arbitror, vocanda est magna aliqua in Medicorum mentibus sedens ratio, quæ non fineret, ut largiùs potarentur aquæ, licèt intensior fæviret febris, & auxilium quæreretur a lymphis, licèt undique grassaretur ignis: Nostri verò temporibus inveniunt largissimæ potationes, præsertim in febribus, tot affeclas, quot Medicos, tot laudatores, quot ægros, nil enim iisdem familiarius est in arte nostrà, & nil utiliùs creditur, aut securiùs; Valida nempè consuetudinis vis secum rapuit Medicos omnes, omnes jam detinet, jam omnibus imperat, neque ex tot millibus unum invenire jam licet, cui insanabilis non videatur febris, nisi pleno aquarum gurgite obruatur febricitas; Ipse tamen non ità facile in animum inducere possum ab uno, eodemque potu largè exhibito sana lædi corpora, & ægra restaurari. Nonne, cum febris urget, universus Naturæ ordo turbatur, & quasi corrui? Separationes, fermenta, vires nonne magnà ex parte tunc temporis prohibentur, vitiantur, deficient? Quomodò ergo tam pleno aquarum gurgite febricitantes obruere posse sine noxa confidimus, cum indè tantum detrimenti ab Hominibus vegetà, & inculpabili sanitate præditis hauriatur, illud roboris, virtutisq; momentum in agro sanguine invenire putantes, quod in sano sanguine desperaremus? Verùm ità exigit, inquiet, ignea febrium conditio, tunc enim mirum, quàm accensus sit sanguis, quàm æstuet, quas secum undique ferat flammæ, flammæque spiret! Meum autem hic non est de vastissimà, & nondum fortasse

certà

certa satis febrium doctrinâ differere, tantum etenim nec vires possunt meæ, nec audet ingenium: An calor ille, de quo febricitantes queruntur, sit febris causa, sit ejusdem effectus, sit febris ipsa, jam curare nobis non libet, & fatemur ingenuè quod negare stultitiam saperet, nullam scilicet sine calore febrem esse, sed comitem habere semper præternaturalem sanguinis ebullitionem, & noxiam effervescentiam; Atque hinc oritur, ut opinor, bibendi, hoc est calorem illum, quo fervet sanguis, temperandi necessitas. Exhibeantur propterea largæ febricitantibus potationes, ita enim exigit ignea Febrium natura, quidam tamen in iisdem servandus mihi videretur modus, ne nimium præceps flammæ ipsas extinguendi cupiditas, eò Medicorum mentes adducat, quò, re maturius perpensâ, nunquam declinare potuissent. Instituendam igitur in bibendo quandam quasi methodum arbitrarer, quæ ægrum sublevaret semper, nunquam everteret, & cavendum, ne irriguus fons ille sit, qui in ejus fauces pleno gurgite derivatur, sed, quibusdam aliquandò interval-
lis, a fluendo cesset penitus, & arescat. Verum quò noster stultè progreditur sermo? Is ne ego sum, qui febribus medendi præcepta aliis tradere audeam rudis in arte nostrâ, & præter nudum Medici nomen, nil aliud habens, de quo meritò gloriari queam? Meum sit potius a sapientissimis Viris, & imitatione dignissimis febrium curationem ediscere, eorum monitis regi, & iisdem itineribus ire, quibus ipsi ad summam Medicinæ gloriam pervenere; Veluti ta-

G 2

men,

men, vel unicum aquæ haustum, in febribus, impro-
 bantium partibus stare pudet, eorumque insana-
 bilem hydrophobiam laudibus excipere, ita nunquam
 tantum erga immodicas potationes amorem amare,
 discam, atque hoc fortasse evenisse arbitror, quod
 veterum Medicorum Monumenta perlustrando, non-
 nulla mihi in omnibus animadvertere licuit, quæ
 grandes has potationes, non modò non laudare, sed
 & improbare videntur: Hippocrates enim, *frigida
 aque*, ait, *copiosior usus convulsiones, distensiones, &
 rigores febriles affert.* [x] Et quidem explicitè satis
 loquitur Vir Singularis, quicquid de iis ipsis Hip-
 pocratis verbis sentiant, sibi que fingant pro genio
 aquosiores interpretes.[y] Galenus etiam mirum quot
 considerata velit, antequam ad frigida usum de-
 scendat, *Si enim*, ut inquit ille, *vires cuncta valen-
 tes sunt, & febris ardentissima, & concoctionis notæ pla-
 nè evidentes frigidam Homini dare audacter debebis, &
 mille insuper hac super re, cautè procedendi vias,
 mille passim in locis, ostendit, undè satis constat,
 eum non adeò huiusmodi potationum amatorem fu-
 isse, ut possit earundem strenuissimus defensor, &
 acerrimus propugnator tam subito nuncupari, ter-
 ruit enim fortasse Virum, aliàs impavidum, quod
 ipse se vidisse asserit, febre scilicèt ardenti laboran-
 tem, (z) *cum morbus invalesceret*, ut ejus verbis utar,
 & fri.*

[x] *De Liquidorum usu.*

(y) *Method. Med. lib. 11.*

[z] *De Sympt. caus. lib. 1.*

*& frigidam imprudenter biberet miserè periisse, aqua
nunquam quoad moreretur expletum. An non & Ara-
bum Medicorum Princeps Avicenna [a] multum
bibere malum appellavit? Ut præteream Hydropis
[b] periculum, quod imminens vaticinatur, si fortè
phlebotomiam præcesserit aquæ plurimæ potus. Quod
si in hujusmodi potationibus moderatiores esse renue-
rent Medici, ne inexplebile bibendi solatium ægris
subducerent, Tullium ipsum audirent, *Valetudo vo-
luptati anteponatur*, clamantem. (c) Et sannè nonnè
pietas foret crudelitate omni crudelior delectationi
Hominum inservire, ut indè in maximum vitæ di-
scrimen adducerentur? Quid juvat suavi undique li-
quore poculum illinire, ut smumans intùs venenum
decepta hauriant labra, & ipsa stet vità aliquanto dul-
cior sapor? Tunc, ut arbitror, frequentes, grandef-
que potationes poscentibus liceret annuere, cum im-
modica bibendi voluptas nil periculi, & nil detri-
menti portenderet, verùm cum æqua vigeat suspicio
a tantà in bibendo intemperantià tantam Hydropum
copiam fortasse derivari, fatiùs profectò erit nostro-
rum malorum segetem fatis, superque fœcundam tot
imbribus destitutam relinquere, ne ab iisdem nimium
irrigata, feracior aliquandò luxuriet, & crescat ube-
rior. Verum noster hūc usque sermo ex unicà flu-
xit hypothese, in sanguinem scilicet transire quod bi-
bitur*

[a] Lib. 1. Fen. 3. Doctr. 2. Cap. 8.


[b] De Remov. Noc. San. Tract. 7. Cap. 2.

[c] De Offic. lib. 2.

bitur, & cum ipso per arterias decurrere. Quid, si ita se res non haberet, & felicioribus aliquandò oculis invenire daretur quod, nec vetusta, nec nostra viderunt tempora, ductus nempe peculiares, & proprios ad potum a ventriculo ad renes, brevi, facillique semitâ, deportandum? Nostra ne tunc argumenta collaberentur penitus, & res veritati adeò consona in turpe degeneraret mendacium? Non ita profectò; Quin potius mirum, quantò faciliùs Hydrops contingeret, si quicquid, bibendo, in ventriculum derivamus, toto suo pondere, totoque suæ fluiditatis momento, in exilissimos, & tenuissimos canaliculos, adeo ut obtutum, si adsint, huc usque fugerint, deberet irruere. Nonne facilior tunc vasorum disruptio? Nonne Corporibus Hydrops proximior? Nonne a largis, & immodicis potationibus periculum majus? Sed de hoc satis; De Rebus fortasse non existentibus, vel saltem nondum compertis qui primus invenerit, & conspicuas fecerit, gloriosius loquatur. Hactenus tot Hydropum, nostris hisce temporibus gliscentium copiam, vel a sanguine nimium a vasis suis effluente, vel a potùs immodicè adhibitâ intemperantiâ oriri posse ostensum fuit, & ab utràque causâ singillatim considerata perniciosissimum, hunc effectum hucusque deduximus. Quid, si modò, quæ divisa tam amplum suspicioni locum fecere, colligantur in unum, & idem aliquandò Corpus, ut in febribus fortasse contingere potest, immodico spolietur sanguine, & immodicà saturetur aquâ? Arbori, ob nutrientis humoris penuriam languidæ
jam

55
jam, ac penè arescenti quid, si addatur torrentis furor agros latè vastantis, ac sylvas, & cum ipsà toto aquarum impetu decertantis? Nil igitur mirum, si, tot hostibus in unum, & jam debile Corpus conspirantibus, cedere infelix, & in extremum ruere, exitium crudeliter cogitur. Resipiscant itaque hi parum prudentes Thaletis Affeclæ, & minori aquam ipsam, si immodica sit, veneratione prosequentes, somnium illud rerum omnium principium Corporum aliquandò destructioni esse sapientius credant.





De Hydropis periculo a Vino, & Spiritu Vini largiùs epoto, & obiter de immodico Chocolatæ usu.

C A P. VII.



Ixerunt plerique adeò feliciter, ut nunquam, aut ab immodicis potationibus, aut a nimia sanguinis effusione tentati fuerint, attamen Hydropes aliquando fiunt, & post lætissimum vitæ cursum funestissimam non rarò subeunt mortem ab eodem oppressi morbo, ad quem tam multos vel propria, vel aliorum incuria perduxit: Aliæ itaque, præter jam recensitas, Ascitis causæ a nobis investigandæ, quibus ipsius debeatur origo, vel a quibus, si non gigni, promoveri saltem possit fatalis hæc Corporum lues. Neque hîc differere juvat de Hydropis causis, ut ita loquamur, intrinsecis, quæ scilicet, a se solis, ejusdem productioni sufficiunt, quæ profectò multæ sunt, & variæ, ut pravus Corporis habitus, mala vasorum constitutio, & similia; Ea enim, quæ nobis nocent, sed absque nobis, sive absque
eo

eo quod ad ea, vel nostra, vel alterius opera concurrat, qua arte, quòve consilio evitari poterunt? Nostrorum nempe malorum radix, si cum nobis nascatur, inextirpabilis, ut plurimum, crescit, non nisi damna germinans, & non nisi ærumnarum foecunda. Quoniam verò per omnes Hominum conditiones, temperamenta, ætates aliquandò vagatur Hydrops, nullique, aut anni, aut Corporum constitutioni quandoque parcit, videndum modò, an effectus adeò universalis universalior non minùs causa, quàm quæ superiùs enumeratæ fuerunt, excogitari possit, eique major tot Hydropum culpa non immeritò adscribi; Cùm autem universalissimus, nostris præsertim, Regionibus, potus sit vinum, illud scilicèt, quod ad sanitatem plerique, quidam ad insaniam, ferè omnes ad delicias bibunt, hoc ipsum potionis genus ad examen revocare libet, & inspicere diligentius, fieri enim poterit, ut quædam nobis in lucem vocare detur, digna fortasse, quæ sibi nostrum vindicent animum, si eà, quæ par est, æstimatione excipiantur. Et quidem utinam, minùs plerosq; rapuisset experta in gustando vino suavitatis, nec nimiùm ab ipsa inescati Homines, nimiùmq; detenti, illud adeò deperditè amare didicissent! Quantò meliùs etiam nunc rebus consulerent suis, vinoque parciùs indulgentes, illud quantò innoxius, immò quantò suis commodiùs Corporibus experirentur! A vino etenim, si ipso moderatè fruamur, testes sunt veteres, recentioresque Medici penè omnes, nostram fulciri sanitatem, & vitam, viresque, si collapsæ fuerint, refici, & si vigeant, servari; Hinc præclarus invaluit usus

Hoc quòd . . . aqua

aquà vinum diluere, quod omnium primus præstasse, dicitur Straphylus Sileni filius [d] ad suberbi liquoris vires, & effrænem indolem compescendam, vinum etenim ipsum, si ei sufficiens aque quantitas misceatur, mirum, quàm innocens fiat, quàm tutum poculum, & quàm salubre! Verùm laudabilis hæc bibendi ratio, licet optimè de omnibus mereatur, non grata tamen omnibus accidit, & jucunda, sed cæco aquam habentes odio nonnulli, illamque vini non minus, quàm Corporum corruptricem stultè appellantes, merum unicè in deliciis habent, ipsumque intemperanter ingurgitant. Jam verò insignes hi potatores, & ad insaniam usque vino indulgentes graves, spumantesque cyathos ponant parumper, & quæ simul cum dilecto liquore pericula bibant sapientiùs intelligentes minùs illi tribuere, propriæq; aliquandò vitæ meliùs consulere discant. Primò itaq; animadvertere oportet, quas Vinum in se ipso mutationes patiatur, seu quid vino ipsi aliquando accidat; Deindè, quid post immodicè assumptum vinum sentiant alii, seu quos intemperantiùs haustum effectus quandoq; producat. Id verò, quod Vino peculiariter contingit, si vel tepido loco, vel Soli diutiùs expositum detineatur, nonne aciditas est, adeò ut tota amabilis liquoris suavisitas in saporem gustui molestissimū, & palati papillas mirabiliter lædentem paulatim degeneret? Quod autem vinum immoderatè haustum consequitur nonne ebrietas est? Ut de hac sola, utpote magis familiari,

magisque ad rem nostram faciente loquamur ; Jam ergo exordiamur a primo, & demonstrationes, quas construere est animus, ut effectus superius recensiti a suis causis deriventur, tanquàm lemmata habeantur iis, quæ in posterum ostensuri sumus, fortasse, non inutiliter præmittenda. Quoniam itaque vinum calido loco detentum supponitur, id vino eidem continget, quod cæteris contingit liquidis, si incalescant, fermentabitur videlicet, partesque ipsum constituentes tumultum quandam, agitationemque concipient, seu tota alterabitur mixtio, seu minimæ vini particule suas exerent proprietates, sed actu acescit vinum, ergo inter particulas ipsum constituentes, quædam etiam aderunt, quæ aciditatis sensum inducere valeant, sed huiusmodi sensationem excitant particule determinatæ quædam figuræ præditæ, ergo in vino aderunt huius generis particule, quæ tamen, antequam fermentesceret vinum, non percipiebantur, quia a particulis reliquis mixtū constituentibus obtundebantur, & ipsæ fortasse quendam inter se ordinem, habitudinem, situmque servabant, per quem ad pungendum, vellicandumque ineptæ fierent ; Patet igitur ex hac vini aciditate, postquam incaluit, in ipso esse quidem acidum, sed impotens ad vim suam exercendam, per calorem verò dissolvi, & a vinculis, quibus tenebatur, liberari. Et hoc quidem vino peculiariter contingere, si ad intensiorem caloris gradum detineatur, innotuit cuique, & cuique experiri fas est ; Quòd verò nunquam in se ipsis Homines vellem experiri illud est, quod a vino largiùs epoto, plerumq; gignitur, ebrietas scilicet, turpis illa Corporum pestis, &

voluntaria animorum infania. Quid enim vinolento Homine excogitari infeliciùs, aut fingi potest? Viribus aliquandò est ita præstantibus, ut fortis ab Aristotele appelletur, [e] aliquandò ita languidis, ut ruinofum Corporis pondus vix regat, lubricus est incessus, nutantes passus, Caput vertiginosum; Obtunditur ingenii acies, animique consilium obtenebratur, & ratio ipsa, præstantissimum illud, divinumq; lumen, de quo unicè humana conditio jure superbit, in fumosis vini vaporibus obruitur, ac sepelitur. Et quis unquam in animum induxisset, nisi hoc vera nimium suaderet experientia, a tam suavi liquore, si intemperantiùs ingurgitetur, tam funestam malorum segetem non rarò produci? Attamen si rem attentius scrutari libeat, hoc ipsum, quod incredibile quid videtur, & quod auditum solum mentem movet, eamque è statu suo quasi deturbat, insignibus potatoribus necessariò evenire faciliè comperiemus. Quoniam etenim vinum calidissimæ naturæ est, & ad quancumque ebullitionem concipiendam aptissimæ, si per arterias cerebro superimpositas feratur fermentescens, & propterea vasa, in quibus continetur, amplians, ac distendens, Cerebrum ipsum comprimet, & liquidum nervorum ad partes violentiùs trudet, sed ab aucto succi nervei influxu augetur etiam fibrarum, musculos constituentium inflatio, ergo in validiores contractiones venient, ergò partes validiùs movebuntur, ergò validiùs exerent robur. Rursus si vasa sanguifera nimium turgentia ductus ipsos nerveos aliquandò

ita

ita premant, ut contento succo aditus omninò liber non pateat, quod maximè contingeret, si ea præsertim piæ matris portio comprimeretur, quæ intexitur trunco omnium nervorum ad foramen magnum occipitis, succus idem nervorum parciùs in musculos influet, seu sanguidiores motiones excitabuntur, seu minuetur, & quasi concidet partium vigor. En igitur primo loco, quomodo a vino liberaliùs hausto robur ebriis modò augeatur, modò nutantem Corporum molem sustinere vix valeant. Patet insuper ex Bellinio, arterias nimio vino infarctas maximè extendi ab impetu, quem exercet extrorsum fervidus, æstuanisque humor, qui per ipsas fluit, ac proindè partes ad contactum arteriarum positas, dummodò cedentes sint, loco dimoveri posse, ac deberè: Sed arteriolæ ad uveæ circumferentiam positæ extenduntur non minùs, & intumescunt, ergo uvea ipsa, per quam feruntur, movebitur qua poterit, retina autem cedens mollisque est, & interior oculus compressilis, igitur introrsum, sive in retinam agetur uvea, igitur partes retinæ sitam mutabunt, igitur species ipsæ ab objectis venientes tunc respectu retinæ situm etiam mutabunt, ergo objecta moveri videbuntur, ergo vertigo excitabitur. Ultimo loco, manifestum est, a sanguine, ob vini effervescentis admixtionem, magnam paritèr concipi effervescentiam, & cùm ejusdem sanguinis portio ad cerebri glandulas feratur, & ex ea producantur spiritus, qui in nervos derivantur, spiritus etiam maximè mobiles, & maximè effrænes producentur, ac proptereà quaquaversum nitentes, atque erumpentes, variasque species minimè cohærentes, incerto tempore, & solo

solo casu excitantes delirium inducent; Quod quidem delirium tamdiù persistet, quamdiù durabit incertus, vagusque specierum motus, seù quamdiù sanguis nimium effervesceat, & æstuabit, seù donec ab intolerabili vini consortio sanguis ipse vindicetur. Jam itaq; in effectibus ostendendis, qui cum ebrietate conjuncti sunt, & a vino intemperantiùs epoto pendent, mira facilitas ex solà hypothefi, vinum calidissimæ, ac ferventissimæ naturæ esse, proveniens, hunc solum mihi fructum pariat, posse scilicet, absque falsitatis notâ, hunc ipsum calorem in vino statuere, etiam quando mixtum fuit cum sanguine, sicuti in eodē mixto pariter cum sanguine acidas particulas jam statuimus. Verùm longâ fatigatum patientiâ videre jam mihi videor gravi tédio lectorem corripere, comem licet, & humanissimum, ubi sumus, aut quò vadimus? exclamantem: Non ebrietatem, sed Hydropem gerit libellus in fronte, nec tot verborum ambages, & remotissimarum rerum inutiles, insulasque demonstrationes aliquid ad rem nostram unicè faciens adhuc excepit. Fateor profectò ipse etiam, ea, quæ huc usque examinare libuit, inanes fortasse digressiunculas, vanasque tricas videri meritò potuisse, attamen, ne diutiùs nostro calamo turpis inuratur nota, prodeat jam rerum superiùs præpositorum necessitas, & sequens Theorema consurgat: A vino scilicet intemperantiùs hausto Hydropem paulatim gigni posse. Quoniam etenim vinum abit in sanguinem, & cum ipso admiscetur, qualitates, seu proprietates suas eidem sanguini communicabit, sed vini proprium est incallescere, ergo & sanguis calidior fiet, & quò major vini quantitas cum

san-

sanguine fluet, seù quò major vini quantitas ingurgita-
bitur; eò major, & intensior calor in sanguine produ-
cetur; sed vinum, si ad intensiorem calorem sentiendum
damnetur, aliquando acescet, ergo si ita intensus, ve-
hemensque fiat sanguinis calor, ut a vino ferri non pos-
sit, absque eo quod in fermentationem, per quam aci-
dum fit, veniat, aciditatem concipiet, & sanguinem
ejusdem participem faciet; Rursus, cum in vinosioribus
Hominibus novus semper, ac novus meri, seu caloris
proventus feratur in sanguinem, seu magis semper, ac
magis incalescat sanguis ipse, poterit aliquandò ad ma-
joris caloris gradum perducì, quàm qui a vino, absque
eo quod acescat, tolerari possit; Immodicè igitur po-
tatum vinum acidum tandem fieri poterit, & conse-
quenter eadem aciditate sanguinem ipsum inficere. Sci-
ant ergo, primo loco, potatores nostri, quotiescumque
se mero intemperantiùs implent, proprium sanguinem
ita afficere, ut veterem amittat indolem, & acidus reve-
ra fiat. Videant jam, secundo loco, quid sibi velit aci-
ditas ista, seù quid periculi, quidve mali portendat.
Acidus sanguis est, facta est ergo ea sanguinis resolutio,
per quam particule tali figurà, & activitate præditæ, ut
aciditatem inducant, jam sui juris factæ sunt, & a reli-
quarum particularum sanguinem constituentium vin-
culis liberæ; in eodem sanguine agitando, pravam in-
dolem, noxiùmque genium exercent: Sed agitari non
potest sanguis, quin in eandem agitationem quicquid in
sanguine est adducatur, sive, quin particulæ ipsæ, quæ
sanguinem agitant, & vehementer dimovent, quicquid
in sanguine est agitent pariter, & dimoveant, ergo in
humo-

humores, qui cum sanguine fluunt, insinuabuntur particulæ agitationem, & dimotionem in eundem sanguinem inducentes, ergo cum humoribus ipsis miscbuntur, sed particulæ istæ, ex superioribus, eâ activitate præditæ sunt, ut aciditatem inducere valeant, ergo in humores, qui cum sanguine fluunt, & consequenter in lympham eandem aciditatem inducent; Acida erit igitur lympba. Hic autem quid eadem, quæ jam in Capite quarto a nobis ostensa fuerunt, repetere juvat? Ibi enim satis, superque demonstravimus, a lympba, quotiescumque ex insipida in acidam transierit, ductuum lymphaticorum disruptionem, & consequenter Hydropem posse facilius induci. Verùm si ab aciditate vini inquierent fortasse Aliqui, timenda est sanguinis, & lymphæ aciditas, & consequenter Hydrops, illa ingurgitari, absque tali periculo vina poterunt, quæ non nisi difficillimè acescunt, seu quæ non nisi post longum temporis intervallum, decantatam contrahunt aciditatem, sed generosiora, ac celebrioris nominis vina prævæ huic fermentationi concipiendæ sunt minùs obnoxia, iis ergo, absque detrimento, sive saltèm absq; Hydropis suspicione, uti etiam intemperantèr poterimus; Nobis itaque gratulemur, quòd a felicioribus Etruriæ collibus integrè ad nos vindemiæ deportentur, vinumque veteribus, aut falernis, aut surrentinis fortasse non secundum nostras coronet mensas, nostrisque saliat incyathis: Hilari propterea animo, suavissimo, veterrimoque liquori indulgentes, eodem madeamus, eodemque faturemur pro genio, nihil enim mali portendit vinum spirituum adeò dives, & a fervidis nondùm victum

æstatibus noxiæ aciditati , per temporis spatium,
adeò diuturnum resistens . Sileant verò stultissimi
potatores nostri , ipsisque de re tanti ponderis attentius
cogitantibus illuceat aliquandò , inter pocula , veritas .
Quoniam etenim, ex dictis, id, a quo vinum in eam fer-
mentationem adducitur , ut acidum fiat, calor est , quo-
tiescumq; calor iste augebitur, accelerabitur, & faciliùs
continget huiusmodi aciditas, sed quò generosiora vina
sunt, eò sunt calidiora, atque intensiorem sanguini calo-
rem, si propinentur, conciliant, poterunt igitur faciliùs,
& celerius fermentescere ; Rursus , quoniam huiusmodi
vina calori resistunt magis , & ab eodem difficiliùs vin-
cuntur, ad hoc, ut aciditatem contrahant, oportebit , ut
calor etiam magis, magisq; augeatur, sed in sanguine, ut
ostendimus, a generosioribus vinis magis, magisq; auge-
tur calor , ergo etiam ab huiusmodi vinis , non minùs
quàm a ceteris obscurioris nominis, conditionisq; igno-
biliaris, insuavis aciditas contrahetur, quantò enim cre-
scit momentum resistentiæ , quod exercetur a vino , ne
dissolvatur , tanto etiam crescit momentum caloris dis-
solventis, qui est in sanguine , seu idem vinum intempe-
rantiùs ingurgitatum, dum magnam in sanguinem cali-
ditatem infert, se ipsum ad acescendum disponit, ac pro-
pterea vina quæcumque, si immodicè iisdem impleatur
sanguis, noxiam fermentationem concipiant oportet, un-
dè eorundem aciditas, & quæ ab ipsa pendent, facile pro-
duci poterunt . Non itaque cuiuscumque vini ignotus
omninò nobis sit usus, ut Romanis [f] olim fœminis fue-
rit, sed neque inexplebilis adeò ipsius nos amor detineat,
I ut

(f) Valer. Max. lib. 1. de Matrim.

ut nullum, in eodem potando, modum fervantes vino simul immodico sanguinē, & immodica abdomen aquā stultē inficiamus: Vel si ea fortasse nostri sanguinis aliquando conditio sit, & lymphaticorum constitutio, ut ille extraneæ æstuantis liquidi effervescentiæ, hæc suæ lymphæ, licet undique impetum facienti resistere diū valeant, nostris tamen viribus parum, aut nihil fidamus, fieri enim poterit, ut sanitas ipsa ab eodem hoste nunquam lasso, & nunquam pugnæ parcenti victa in exitum paulatim ducatur, veluti ab iteratis ejusdem securis ictibus reciditur tandem, & corruit annosa licet, & fortis Ilex, quæ primos ferri ferientis insultus, aut spreverat, aut non senserat. Deplorabilis profectò res est, & lachrymis, quàm admiratione dignior, insignes hosce potatores, cum lautè convivantur, intueri. Lasciantur famuli vini pocula, inter epulas, ministrantes, vino madent mantilia, vino aer ipse, locusque redolent, & in uno ventre plurimarum gentium, & regionum, vina conduntur, Nec tantum ea dapibus commiscunt nonnulli, sed cibo pleni, jam jamque a mensa discessuri plures aliquando cyathos veterrimo, suavissimoque liquore inanire non dubitant per varia vinorum genera intemperantiam ducentes, non sitim. Hi tamen (quis crederet?) Homines illi sunt, qui tantam stomachi saturitatem jactant, ut ne ab uncia quidem novi cibi graviss onerari patiantur, & cum uncia unius ponderi sustinendo eorum ventriculus, ut asserunt, jam non sit satis, a pluribus vini libris, post ipsum prandium, quando scilicet se a quocumque cibo, licet levissimo opprimi faterentur, refici se dicunt, & sublevari. Quo autem insa-

nos

nos potatores nostros adduxit vini amor infanior? Quis illis adeò rationis lumen excæcavit, & mentem abstulit, ut magnum vini pondus levissimo panis frustulo levius & credant ipsi, & ab aliis credi velint? Ipse quidem stultorum Hominum stultissimæ Sententiæ nunquā subscribam, cum ab æqualibus cibi, potûsq; ponderibus æqualiter etiam ventriculi, & canalium, per quos indè fluunt, membranę urgeantur, premanturque. Quid ergò mirum, si vino adeò intemperantèr utuntur nonnulli, cum in eodem vel ipsam gravitatē statuere nesciant, & illud quod tantum pendet, cum spumat in poculis omni pondere carere arbitrentur, cum Stomachi membranas inundat? Quomodo vini proprietates sensibus minùs pervias, & pericula ab ipsis provenientia percipere poterunt, aut volent, si quod familiare liquidis omnibus est, & de quo testes sunt sensus ipsi, gravitatem scilicet vino tribuere, aut callidè, aut insipientèr recusant? Rem tamen, quocumque libuerit modo, sibi fingat vinosior populus, proprias, peregrinasq; vindemias absumat, & mero tam immodicè impleri, non exitiale quid, funestumque vocet, sed innocens palati oblectamentum, & firmissimum sanitatis præsidium, fieri enim fortasse poterit, ut a propriis eruditus damnis incredulitatem aliquandò, & insaniam lugeat suam, post tam uberem vini proventum, tantam aquæ colluviem in abdomine colligi potuisse serò nimis, & inutilitèr obstupescens. Verùm quid ultrà intemperantes inter, ebriosque Homines immoramur? tempus jam, ut ad sanitatis amantiore viros, eamq; attentius custodiri nitentes mens nostra convertatur, & sermo. Hi sunt qui spiritum vini frequenter

potant, ad stomachum, ut ajunt, corroborandum, ejusdem acido addendas vires, & concotionis opus facilius, & perfectius absolvendum. Potest ne suavior, & felicior comparari fructus, aut finis excogitari laudabilior, quàm Chyli fabricam, a qua necessaria sanguinis reproductio pendet, promovere, & vitam ipsam in præclarissimo concotionis opere principaliter sitam, illæsam, sospitemque servare? Attamen hæc ipsa, in re tanti ponderis tutè assequenda, facilitas non inanem in me formidinem excitat, aliquid periculi in tantà securitate occultari, & herbas inter, floresq; ver promittentes amœnissimum, funestum latere anguem venenato morfu timendum, & mortem sibilo minitantem. Inquiunt itaq; sapientes hi sanitatis, concotionisq; propugnatores, hanc a frequenti spiritus vini usu adjuvari mirum in modum, illamque consequenter ab eodem potu sæpius assumpto incolumem sustineri, & a cujuscumque exitii periculo vindicari. Mihi tamen dicerent velim, quid spiritus iste sit, cui tantum se fidunt plerique, & quod, velut aliquid a Cœlo proveniens, commendare passim, sibi que ipsis exhibere non desinunt? Nonne vini pars est magis activa, volatilis magis, ac magis ignea? Nonne quod igneum magis in vino est, sanguinem, ut superius demonstravimus, inficit, & Hydropis paulatim periculo Homines damnat? Quid igitur de nostro spiritu dicendum, si a vino se junctus in sanguinem abeat, cùm illum de eodem sanguine tam malè mereri ostensū sit, si vino permixtus arterias subeat, & venas? Cùm vinum transit in sanguinem, suus etiam in eundem transit spiritus, sed a fibrosis, crassioribusq; vini particulis ita retusus, ut noxius

tunc

tunc solùm fieri incipiat, fermentationemque in arteriis periculo plenâ excitare, cum ab iisdem crassioribus partibus dissolutus, & liber jam nihil habet, quod activitatē suam obtundat, igneasq; prorsus vires compescat; Quid ergo præstabit idem spiritus, cū à quocumque vinculo solutus sanguini admiscetur, totoque suæ virtutis momento, in eundē impetum facit? Celerius profectò, cum solus abit in sanguinem, effectus illos producet, quos nō nisi tardiùs, cum vino permixtus in eundem ferebatur, gignere poterat, ac propterea ad spiritum vini confugere, ut ventriculum fulciat, sanitatemq; tueatur, perindè est, ac si medio mari deprehenso, & longà tempestate jactati auxilium a ventis simul decertantibus speraremus, salutem nostram, & vitam ipsis procellarum Authoribus stultissimè commendantes. Pereat ergo ab Hominū memoriā, qui pulcherrimam hanc sanitatis diutiùs servandæ methodum primus edocuit, nosq; salubrioribus consiliis sapientiùs innixi inanem valetudinis spem tantemere renuamus, sed veluti ab immodico vini potu tam magnam Hydropis suspicionem oriri posse didicimus, ita a frequenti spiritus vini usu idem facilius ejusdem morbi periculum, ut superiùs ostensum fuit, justissimè timeamus; Et profectò si omnis à nobis non exularet formido, nobisque timere magis aliquandò disceremus longiùs fortasse abesset Hydrops, & cautè viventes fatale hoc vitæ periculum rideremus: Verùm nimium viribus nostris tribuimus, & nostræ conditionis obliti, immensumq; prorsus robur in debili Corporum compage somniantes illam continuò crebris, gravibusque ictibus laceffire non dubitamus. Quid ergo mirum, si dum adeò

incau-

incautè proprià abutimur sanitate, eam deindè amissam inutilibus sepè lachrymis prosequi infelicitèr cogimur? Laudabilem victus rationem, & quæ sapientem Homine debeat instituere stultitiam apud nos redolet, quasi displiceat vita moderationis legibus serviens, & de propria conservatione attentius sollicita. Meum hic non est per universa rerum genera, a quibus lædimur, & a quibus lædi libentèr patimur, sermonem ducere, tot enim sunt, ac tam varia, ut non nisi longissimà enumeratione complecti possint, quicquid etenim voluptatem ciet, & gustum allicit, impatienti expetimus animo, nulla conditionum, & qualitatum, quæ cibum comitantur, potumque, ratione habità, & an inde sanitatis conservatio, aut exitium oriri possit inspicere diligentius indignantes. Exemplo sit Chocolata, decantatum illud palati fascinum, sine quo frigent Amicorum conventus, & quo redolent vel ad voluptatem, vel ad luxum Aule, theatra, convivia, ipsique Sapientum confessus, suavis etenim est, & mirà gustum delectatione afficit peregrina potio, attamen si eà ultra moderationis leges saturemur, mille nosmetipsos periculis, & detrimentis mille damnabimus: Si enim Cacacium Chocolatæ caput, & quasi basim perpendamus, crassæ, pinguis, ac summè viscidæ substantiæ comperietur, aptæ scilicèt ad præternaturalem humoribus visciditatem conciliandam, obstructionesq; in nostro Corpore efformandas, inter morbos autem, qui obstructiones hujusmodi aliquandò consequuntur, nonnè et Hydropem superiùs meritò numeravimus? Enigiture quid tanta in Chocolatæ usu intemperantia portendere non rarò possit solà cacacii ratione habità, quid si etiam

71
si etiam Vahinillæ, Cinnamomum, & Saccharum, aromata nimirum, & sal ad celebris potionis fabricam concurrentia perpendi velint? Nonne ab his ita affici potest sanguis, ut dimotionem magnam, agitationemque, & quendam quasi tumultum in minimis suis componentibus concipiat, adeo ut ab ipso dissoluto nimium, & nimium effræni arteriarum oscula paulatim laxentur, & aquosiori ejusdem parti facilior ad diffundendum extra vasa, tali pacto, sternatur via? Parcius ergo deliciis nostris fruamur, nec mentem adeo voluptas auferat, ut de periculis inde nascituris, nostræque imminetibus sanitati nunquam, quantum rei dignitas postulat, cogitemus; testis enim Seneca est (g) *nulum hostem in quenquam adeo contumeliosum esse, quam in quosdam suæ sunt voluptates*. Intemperantibus linquatur Indis indicæ potionis usus etiam intemperantior, & a tam diffitis, olimque barbaris Nationibus peregrinos mores emendicare pudeat, præsertim si nostris concurrant damnis, & oblectare nesciant, nisi lædant. Melius igitur nostris consulamus rebus, & rerum omnium pretiosiores valetudinem esse aliquando discentes, nullum non moveamus lapidem, ut, quantum humana conditio patitur, incolumis duret, ne ipsa demum amissa, exitii nostri causam in nosmetipsos nunquam, delicias nostras ad rectam rationis, viteque normam dirigentes, refundere inutiliter debeamus.

F I N I S.

INDEX CAPITUM.

Dicendorum Occasio, & Ordo. CAP. I.	Pag.	1.
Veterum Medicorum de Hydrope, ejusque Causis Sententiæ. CAP. II.	Pag.	4.
De Ductibus lymphaticis, & lymphæ. CAP. III.	Pag.	9.
Hydropis Systema ex Recentiorum inven- tis. CAP. IV.	Pag.	16.
Quomodo ab Hæmorrhagia immodica Hy- dropis periculum induci possit. CAP. V.	Pag.	28.
Quomodo a largis potationibus non levis Hydropis suspicio oriri possit. CAP. VI.	Pag.	43.
De Hydropis periculo a Vino, & Spiritu Vini largiùs epoto, & obiter de immodi- co Chocolatæ usu. CAP. VII.	Pag.	56.





